

四庫全書

史部

欽定四庫全書

史部

文獻通考卷二百五十二

詳校官內閣學士

臣 孫保

編修

臣 程嘉謨 覆勘

覆校官中書

臣

孫希旦

校對官中書

臣

王彞憲

謄錄監生

臣

史廷彝

欽定四庫全書

文獻通考卷二百五十一

鄧陽馬端臨

貴與著

帝系考二

太上皇太皇太后皇太后

母后臨朝稱制及推尊私親父母附追尊私

親父母見宗廟門此不錄

虞舜踐帝位乃載天子旌旗往朝瞽瞍唯謹以子道

孟子咸邱蒙問曰語云盛德之士君不得而臣父不

得而子舜南面而立堯帥諸侯北面而朝之瞽瞍亦
北面而朝之舜見瞽瞍其容有憾孔子曰於斯時也
天下殆哉岌岌乎不識此語誠然乎哉孟子曰否此
非君子之言齊東野人之語也堯老而舜攝也堯典
曰二十有八載放勳乃徂落百姓如喪考妣三年四
海遏密八音孔子曰天無二日民無二王舜既為天
子矣又帥天下諸侯以為堯三年喪是二天子矣朱

集註咸邱蒙孟子弟子語古語也感輦感不自安也岌岌不安貌言人倫乖亂天下將危也齊東齊國東

鄙也孟子言堯但老而不治事而舜攝天子之事堯
時舜未嘗即天子位堯何由北面而朝之乎又引書
及孔子之咸邱蒙曰舜之不臣堯則吾既得聞命矣
言以明之

詩云普天之下莫非王土率土之濱莫非王臣而舜
既為天子矣敢問瞽瞍之非臣如何曰是詩也非是
之謂也勞於王事而不得養父母也曰此莫非王事

我獨賢勞也

不臣堯不以堯為臣使北面而朝也詩
小雅北山之篇普徧也率循也此詩今

毛氏序云役使不均已勞於王事而不得養其父母
焉其詩下文亦云大夫不均我從事獨賢乃作詩者
自言天下皆王臣何為獨使我以賢
才而勞苦乎非謂天子可臣其父也孝子之至莫大

乎尊親尊親之至莫大乎以天下養為天子父尊之至也以天下養養之至也詩曰永言孝思孝思維則

此之謂也

言瞽瞍既為天子之父則當享天下之養此舜之所以為尊親養親之至也豈有使

之北面而朝之理乎詩大雅下武之篇言人能長言孝思而不忘則可以為天下法則也書曰祗

載見瞽瞍夔夔齊栗瞽瞍亦允若是為父不得而子

也

書大禹謨篇也祗敬也載事也夔夔齊栗敬謹恐懼之貌允信也若順也言舜事瞽瞍往而見之敬

謹如此瞽瞍亦信而順之也孟子引此而言瞽瞍不能以不善及其子而反見化於其子則是所謂父不

得而子者而非如咸邱蒙之說也

漢高祖六年尊太公為太上皇

上歸櫟陽五日一朝太公太公家令說太公曰天無二日土無二王皇帝雖子人主也太公雖父人臣也

奈何使人主拜人臣如此則威重不行後上朝太公

擁彗

李奇曰為恭也如今卒持帚也師古曰彗所以掃也音似歲反

迎門卻行卻退而行

上大驚下扶太公太公曰帝人主奈何以我亂天下法於是上心善家令言賜黃金五百斤夏五月丙午詔曰人之至親莫親於父子故父有天下傳歸於子

子有天下尊歸於父此人道之極也前日天下大亂
兵革並起萬民苦殃朕親被堅執銳自帥士卒犯危
難平暴亂立諸侯偃兵息民天下大安此皆太公之
教訓也諸王通侯將軍羣卿大夫已尊朕為皇帝而
太公未有號今尊太公曰太上皇

師古曰太上極尊之稱也皇君也天

子之父故曰皇不預
治國故不言帝也

後漢荀悅曰孝經云故雖天子必有尊也言有父
也王者父事三老以示天下所以明孝也無父猶

設三老之禮況其存者乎孝莫大於嚴父故子尊不加於父母家令之言於是過矣

晉愍懷太子令問中庶子劉寶云太公家令說太公為是為非對曰荀悅論賜家令為非臣以為悅不識高帝意高帝雖貴為天子事父不失子之禮時即位已六年而不加父號是以家令言雖父乃人臣也言無可尊敬當與人臣同禮欲以此感動之帝聞家令言乃悟即立號太上皇得人子尊父

之道若不聞家令言父終無號矣家令說是也

古師

亦以為善其發悟已心因得尊崇父號非善其令父敬已

漢因秦之稱號帝母稱皇太后祖母稱太皇太后

高祖崩惠帝即位尊呂皇后為皇太后

太后首末並見皇后門後同

惠帝崩太后取後宮子名為孝惠子立之年幼太后臨

朝稱制

師古曰天子之言一曰制書二曰詔書制書者謂為制度之命也非皇后所得稱今呂太后臨

朝行天子事斷決萬機故稱制詔

立兄子呂台產祿台子通四人為王

封諸呂六人為列侯四年少帝自知非皇后子出怨言

太后廢之立恒山王弘為帝八年皇太后崩諸呂謀亂大臣誅之

文帝立尊母薄姬為皇太后

姬初為代太后

薄氏侯者一人後

文帝崩二歲孝景前二年崩葬南陵因呂后不合葬長陵故特自起陵近文帝

景帝立尊母竇皇后為皇太后竇氏侯者三人後景帝六歲以武帝元光六年崩

武帝立尊母王皇后為皇太后王氏田氏侯者凡三人

後景帝十五歲元朔三年崩合葬陽陵

昭帝崩霍光迎立昌邑王賀尊上官皇后為皇太后既廢賀立宣帝尊太后為太皇太后以建昭二年崩合葬平陵

元帝立尊孝宣王皇后為皇太后元帝崩成帝即位為太皇太后王氏列侯二人關內侯一人時成帝母亦姓王氏故世號太皇太后為邛成太后永始元年崩合葬

杜陵稱東園

師古曰雖同營兆而別為墳王后陵次宣帝陵東故曰東園也

成帝立尊母王皇后為皇太后以平陽侯鳳為大司馬
大將軍領尚書事又封太后同母弟崇為侯鳳庶弟譚
為關內侯後五年又封舅譚商立根逢時皆為侯世謂
之五侯後又封兄子莽為新都侯哀帝即位尊為太皇
太后哀帝崩無子太皇太后以莽為大司馬立平帝太
后臨朝委政於莽羣臣希旨奏請莽為安漢公宰衡平
帝崩莽徵宣帝元孫嬰為帝居攝踐祚既而即真號太
后為新室文母年八十四建國五年崩合葬渭陵

司徒掾班彪曰三代以來春秋所記王公國君與其失世希不以女寵漢興后妃之家呂霍上官幾危國者數矣及王莽之興由孝元后歷漢四世為天下母享國六十餘載羣弟世權更持國柄五將十侯卒成新都位號已移於天下而元后拳拳猶握一璽不欲以授莽婦人之仁悲夫

致堂胡氏曰外戚之禍在王氏然漢初功臣平勃等預有臯焉高祖崩唱言呂后與帝共定天下帝

王諸劉后王諸呂無不可者

共定之語本出酈寄然當時必有此議論

於是大裂土疆以王諸呂侵弱劉氏罪一也孝惠
即世聽張辟疆之說縱諸呂居中用事專權禁閹
共幹兵柄上以媚太后下以安已身由是諸呂不
可制罪二矣高氏即世雖能誅諸呂立孝文然自
茲以往母后習見前世用事例為出閭之言觀大
臣議所言皆曰齊王高帝孫然母家駟鈞惡淮南
王母家又惡獨代王母家薄氏謹良遂立孝文則

平勃之徒畏母后深矣蓋漢母后預政不必臨朝
少主雖長君亦然竇太后好黃老惡儒士儒士多
不得進趙綰王臧欲助上興制度則發其姦利害
之竇嬰兄子也惡之則除門籍喜之則為相梁孝
王愛之則誦言請立為嗣不顧大宗之重王太后
於灌夫罵坐則不食論棄市韓嫣帝所貴也太后
欲殺之則帝不能救可謂司晨預事矣武帝欲立
昭則先殺鉤弋夫人馴致王氏篡奪其所從來者

遠矣

先公曰今按胡氏之說足以盡西京外戚貽禍之本末矣嘗因是而極論之天地間有陽不能無陰陰而乘陽則宇宙分裂人極隳亡矣歐陽公謂宦官之禍甚於女子蓋為唐末一代言之耳以古今大勢論則女禍深矣少女子能蠱惑人主以亡國老女子能崇長外戚以亡國三代之亡國皆由此物矣周之東遷以褒姒周雖不亡於此已衰於此

矣秦后始有宣太后穰侯之專莊襄悅美姬以易

其宗漢高帝起於閭閻呂氏初無功於王業也而

漢初諸人之論每以為呂氏雅故本推轂高帝就

天下

田生語註謂翼戴以成帝業若車之行助推其轂

又謂呂后與高帝

共定天下

酈寄語

是以諸呂之心自謂與諸劉等憫

然有取而代之之意而後動於惡中間霍氏擁昭

立宣陰妻邪謀特覺之早耳而終不免新莽之亂

焉曹魏之見篡於司馬氏也一再廢殺專以母后

為之主及晉武帝平吳之後耽惑女寵楊賈實召
劉石紛爭之亂天下既為南北矣齊陳以女色亡
元魏以淫后亡隋文帝起外戚以篡周唐高祖主
外戚竊宮嬪以取隋太宗寵武才人開聚麀之醜
子孫殲焉祿山之起為太真妃也唐雖未亡於此
而已衰於此矣河朔失而勁兵亡東南虛而蠻禍
起非權輿於天寶末乎朱梁以女寵開子禍而亡
後唐莊宗以劉后殺功臣靳軍賞而亡皆女子之

為也

哀帝立尊趙后為皇太后趙氏侯者二人哀帝為太子
頗得趙太后力傳太后恩趙太后趙太后亦歸心故成
帝母及王氏皆怨之哀帝崩王莽白太后太后詔有司
曰前皇太后與昭儀俱封帷幄姊弟專妬殘滅繼祀以
危宗廟貶為孝成皇后徙北宮後月餘復詔廢為庶人
就其園自殺立十六年哀帝既為太子成帝母王太后
欲令傳太后

哀帝祖母

丁姬

哀帝母

十日一至太子家成帝曰

太子承正統共養陛下不得復顧私親王太后曰太子小而傳太后抱養之今至太子家以乳母恩耳於是令傳太后得至太子家丁姬以不小養太子獨不得哀帝即位王太后詔令傳太后丁姬十日一至未央宮後下詔尊定陶共王為共皇尊傳太后為共皇太后丁姬為共皇后各置左右詹事食邑如長信宮中宮後歲餘下詔曰漢家之制推親親以顯尊尊定陶共皇之號不宜復稱定陶其尊共皇太后為帝太太后丁姬為帝太后

復又更號帝太后為皇太后稱永信宮帝太后稱中安宮而成帝母太皇太后本稱長信宮成帝趙后為皇太后並四太后各置少府太僕秩皆二千石傅氏侯者六人傅太后既尊後尤驕元壽元年崩合葬渭陵稱孝元傅皇后丁氏侯者二人太后建平二年崩起陵恭皇之園哀帝崩王莽秉政使有司舉奏丁傅罪惡皆免官爵徙故郡貶傳丁二太后號夷其陵

東漢明帝即位尊陰皇后為皇太后永平七年崩在位

二十四年年六十合葬原陵

肅宗即位尊馬皇后為皇太后帝欲封爵諸舅太后不聽建初四年崩在位二十三年年四十餘合葬顯節陵和帝即位尊竇皇后為皇太后太后臨朝兄憲等並顯貴擅威權後密謀不軌發覺誅九年太后崩在位十八年臨朝四年未葬而帝母梁貴人姊嬀一計反上書陳貴人為后所陷枉歿之狀太尉張酺等請依光武黜呂太后故事貶太后尊號不宜合葬先帝帝手詔曰竇氏雖

不遵法度而太后常自減損朕奉事十年深惟大義禮臣子無貶尊上之文恩不忍離義不忍虧按前世上官太后亦無降黜其勿復議於是合葬敬陵

和帝崩長子平原王有疾而諸皇子夭歿前後十數後生者輒隱秘養於人間殤帝生始百日鄧皇后迎立之尊后為皇太后太后臨朝殤帝崩太后定策立安帝猶臨朝政以連遭大憂百姓苦役乃詔減除浮費錄冤獄自太后臨朝水旱十載四夷外侵盜賊內起每聞人饑

或達旦不寐躬自減徹以救災厄故天下復平歲還豐穰永寧二年崩在位二十年臨朝十七年年四十一合葬順陵

范曄論曰鄧后稱制終身號令自出術謝前政之

良身闕明辟之義

前政謂周公也辟君也尚書曰朕復子明辟言周公攝位復還

成王今太后不還故曰闕也

至使嗣主側目斂衽於虛器

器謂神器

喻帝位也

直生懷懋懸書於象魏

象魏闕也直生杜根等上書請太后還政

借之儀者殆其惑哉

借猶假也殆近也言太后然不還政於安帝近可惑也

而建光之後王柄有歸

太后建光之中崩

遂乃名賢戮辱

便孽黨進

帝寵用乳母王聖及其女伯榮出入宮掖通傳姦賂太尉楊震及鄧騭皆被中

官譖誅也

哀數之來茲焉有徵

數敗也安帝臨政衰敗逾甚故曰有徵也故

知持權引謗所幸者非已焦心卹患自強者唯國

言執持朝權以招衆謗者所以班母一說闔門辭

事

太后兄大將軍騭以母憂上書乞身太后不許以問班昭乃許之語見昭傳也

愛姪微

愆髡剔謝罪

太后兄騭子鳳受遺事泄騭遂將杜髡妻及鳳以謝天下語見騭傳

根逢誅未值其誠乎

誠信也言未為太后所信

但蹊田之牛奪

之已甚

左傳申叔時曰牽牛以蹊人之田而奪之牛牽牛以蹊者信有罪矣而奪之牛罰已

重矣此喻杜根上書雖曰有罪太后殺之為過甚也

安帝閻皇后與兄顯及江京譖皇太子保廢為濟陰王

帝崩為皇太后欲久專國政貪立幼年與顯等定策禁

中迎濟北惠王子北鄉侯懿立為皇帝太后臨朝

蔡邕獨斷

曰少帝即位太后即代攝政臨前殿朝羣臣太后東面少帝西面羣臣奏事上書皆為兩通一詣后一詣少帝

少帝立二百餘日而薨京白太后徵濟北河間王子未

至而中黃門孫程等合謀殺江京等立濟陰王是為順

帝顯等皆伏誅遷太后於離宮家屬徙比景明年太后崩在位十二年合葬恭陵

順帝崩梁皇后無子美人虞氏子炳立是為冲帝尊后為皇太后太后臨朝冲帝尋崩復立質帝猶秉朝政時寇盜羌蠻擾亂賦斂煩數官民困竭太后夙夜勤勞推心拔賢委任太尉李固等拔忠良誅貪慝崇節儉寇夷消弭海內肅然而兄大將軍冀鴆殺質帝專權暴忌數以邪說疑誤太后遂立桓帝而誅李固天下失望和平

元年歸政尋崩在位十九年臨朝六年年四十五合葬
憲陵

桓帝既立追尊本生父蠡吾侯翼為孝崇皇帝梁太后
既崩乃追尊妾母匱氏為孝崇皇后遣司徒持節奉策
授璽綬賁乘輿器服備法物宮曰永樂置太僕少府以

下皆如長樂宮故事

漢官儀曰帝祖母稱長信宮帝母稱長樂宮故有長信少府長樂少

府及職吏皆宦官為之

又置虎賁羽林衛士起宮室分鉅鹿九縣

為后湯沐邑在位三年元嘉二年崩以帝弟平原王石

為喪主葬儀比皇后

桓帝崩無子竇皇后為皇太后臨朝定策立解瀆侯宏
是為靈帝太后父大將軍武謀誅宦官而中常侍曹節
等矯詔殺武遷太后於南宮雲臺家屬徙比景竇氏雖
誅帝猶以太后有援立之恩朝於南宮親饋上壽供養
資奉有加於前熹平元年崩立七年合葬宣陵

靈帝既立追尊本生父解瀆亭侯養為孝仁皇帝夫人
董氏為孝仁皇后迎至京師居南宮嘉德殿宮稱永樂

及竇太后崩始預政使帝賣官求貨帝崩何太后臨朝
孝仁后欲參預政事太后輒禁塞之忿恚太后與兄何
進謀奏蕃后故事不得留京師請遷本國收其兄子重
免官重自殺孝仁后以憂崩在位二十二年

靈帝崩皇子辨即位尊母何皇后為皇太后臨朝后兄
大將軍進欲誅宦官不克反為所害董卓將兵入洛陽
遂廢少帝而立協是為獻帝遷太后於永安宮遇鳩而
崩在位一年

范曄論曰自古雖主幼時艱王家多釁必委成家

宰簡求忠良未有專任婦人斷割重器唯秦羊太

后始攝政事故穰侯權重於昭王家富於嬴國

太后

昭王母也號宣太后史記曰昭王立年少宣太后自知事以同母弟魏冉為將軍任政封為穰侯太后攝政始於此也漢仍其謬知患莫改東京皇統屢絕權

歸女主外立者四帝

安質桓靈

臨朝者六后

章帝竇太后和熹鄧

太后安思閭太后順烈梁太后桓思竇太后靈思何太后也

莫不定策帷帟委

事父兄貪孩童以久其政抑明賢以專其威

周禮幕人

掌帷帝幄幕之事鄭元註曰帝幄中坐上承塵也
煬帝崩鄧太后與兄厲等定立安帝年十三冲帝
崩梁太后與兄冀迎立質帝年八歲質帝崩太后
與兄冀迎立桓帝年十五桓帝崩竇太后與父武
迎立靈帝年十二任重道悠利深禍速身犯霧露於雲臺

之上

霧露謂疾病也不可指言死故假霧露以言之靈帝時中常侍曹節矯詔遷太后於雲臺

謝弼上封事曰伏惟皇太后援立明聖幽居空家宮如有霧露之疾陛下當何面目以見天下

嬰縲紲於囹圄之下

縲索也紲繫也囹圄周獄名也鄉亭之獄曰圜音五旦反

謂外戚等被誅也

湮滅連踵傾軛繼路

踵跡也軛車轅也賈誼曰前車覆後

車戒而赴蹈不息焦爛為期終陵夷大運淪亡神寶

陵夷猶類替
神寶帝位也

詩書所歎略同一揆故考列行跡以

為皇后本紀

魏文帝受禪尊卞后曰皇太后稱永壽宮明帝即位尊
太后曰太皇太后太和四年崩合葬高陵

黃初元年詔曰婦人與政亂之本也自今以後羣臣
不得奏事太后后族之家不得當輔政之任又不得
橫受茅土之爵以此詔傳之後世若有違背天下共
誅之

明帝立尊郭皇后為皇太后稱永安宮青龍三年帝數問甄后死狀於太后由是太后以憂崩

齊王即位尊郭皇后為皇太后稱永寧宮其後值三主幼弱宰輔統政與奪大事皆先咨啓於太后而後施行母邱儉鍾會等作亂咸假其命以為辭焉景元四年崩葬高平陵西

景元元年十一月燕王表賀冬稱臣

帝即燕王宇之子宇稱臣故以為疑

詔曰古之先王者或有不臣今王宜依此表不稱臣乎

又當為報答夫係大宗者降其私親況所係者重邪若
便同之臣妾朕所未安其皆依禮典據當務盡其義有
司議奏以為禮莫崇於尊祖制莫重於王典禮下紹大
宗之重崇三祖之業伏惟燕王禮尊屬戚正位蕃服躬
秉虔肅以先萬國其於王典闡濟大順誠宜割以非常
之制奉以不臣之禮臣等立議以為燕王章表可聽如
舊式中詔所施宜曰皇帝敬問大王侍御議又云至於
制書國之舊典朝廷所以辨章於天下者也宜循法故

曰制詔燕王議又曰凡詔命制書奏事上書文書有應稱燕王者皆云上字其非宗廟助祭之事不得稱王名奏事上事及吏人皆不得觸王諱以彰殊禮加於羣后云上遵王典尊祖之制俯順聖旨敬承之心

晉何琦議曰父母之尊擬則天地君親之道資敬是同今承受命運君臨率土而父以子尸天祿不敢子天子以明王者之尊而子雖以為天子必有尊也推斯以言父必臣天位之君而子自必尊天

性之父

晉惠帝即位尊楊皇后為皇太后后父駿受遺詔輔政
元康元年賈后不肯以婦道事太后又欲干預政事而
為太傅駿所抑乃啓帝作詔誣駿謀反誅之夷其族賈
后矯詔使後軍將軍荀悝送太后於永寧宮特全太后
母高都君龐氏之命聽就太后居尋復諷羣公有司奏
曰皇太后陰潛姦謀圖危社稷飛箭繫書要募壯士同
惡相濟自絕於天魯侯絕文姜春秋所許蓋奉祖宗任

至公於天下陛下雖懷無已之情臣下不敢奉詔詔曰
此大事更詳之有司又奏宜廢皇太后為峻陽庶人中
書監張華議皇太后非得罪於先帝今黨其所親為不
母於聖世宜依漢廢趙太后為孝成后故事貶皇太后
之號還稱武皇后居異宮以全始終之恩左僕射荀愷
與太子少師下邳王晃等議曰皇太后謀危杜稷不可
復配先帝宜貶尊號廢詣金墉城於是有司奏請從晃
等議廢太后為庶人詔可又奏楊駿造亂家屬應誅詔

原其妻龐命以慰太后心。今太皇后廢為庶人，宜以龐付廷尉行刑。詔不許。有司復請，乃從之。龐臨刑，太后抱持號咷，截髮稽顙，上表詣賈后，稱妾請全母命，不見省。董養遊太學，升堂嘆曰：「朝廷建斯堂，將以何為乎？」每覽國家赦書，謀反大逆皆赦，至於殺祖父母、父母，不赦者，以為王法所不容，故也。奈何公卿處議文飾典禮，乃至此乎？天人之理，既滅大亂，將作矣。二年，太后以絕膳而崩。年三十四，在位十五年。永嘉初，追復尊號。

致堂胡氏曰按羣公有司所奏張華所議徑以太
后圖危社稷不母於聖世方是時討楊駿者兩親
王將殿中兵而出駿既無逆謀至是又未嘗有一
戈指闕坐受攻討感迫而死太后以父之故射帛
於外以祈免耳不知何名為圖危社稷不母於聖
世乎及有司再請廢后為庶人詔旨畫可華不復
切諫依阿緘默陰附虐后而庸奴其君不待式乾
之事已當誅殛不得赦矣

先公曰賈后殺故楊太后饑而死之也武帝身創大業且智力足以得天下而無以保妻子何也司馬氏三世以來強人之母以廢人之子奪人之國宜有斯報矣彼且以虛罪誣高貴鄉公而實受報於武悼后且皆是賈氏發之駕虛罪於高貴鄉公者充也效實報於楊太后者南風也天道昭昭亦巧於示報矣

東晉成帝即位尊庾皇后為皇太后羣臣奏天子幼冲

宜依漢和熹皇后故事辟讓數四不得已臨朝稱萬機
后兄中書令亮管詔命公卿奏事稱皇太后陛下及蘇
峻作逆京師傾覆后見逼辱遂以憂崩年三十二在位
六年

哀帝即位詔有司議生母章貴人位號乃尊為皇太妃
儀服與太后同又詔朝臣不為太妃敬合典禮不太常
江迫議位號不應盡敬興寧元年薨帝欲服重服
江彰啓應總麻三月詔欲降為期年彰又啓厭屈私情

所以上嚴祖考帝從之

穆帝即位尊褚皇后為皇太后以帝幼冲臨朝稱制太常殷融議從鄭元議后父衛將軍裒在宮庭則盡臣敬太后歸寧之日自如家人之禮太后詔曰典禮誠所未詳如所奏是情所不能安也更詳之征西將軍翼等議謂父尊盡於一家君敬重於天下鄭元議合情理之中太后從之自是朝臣皆敬裒焉帝加元服乃居崇德宮哀帝海西公之世太后復臨朝稱制簡文帝即位尊后

為崇德太后帝崩孝武幼冲羣臣復請臨朝孝武冠復稱崇德太后太元九年崩於顯陽殿年六十一在位四十年太后於帝為從嫂朝議疑其服太學博士徐澡議曰資父事君而敬同又曰其夫屬父道者妻皆母道也則夫屬君道妻亦后道矣服后以齊母之義也魯譏逆祀以明尊卑今上躬奉康穆哀皇及靖后之祀致敬同於所天豈可敬之以君道而服廢於本親謂應齊縗期從之

孝武皇帝即位尊生母李氏為淑妃太元三年進為貴人九年又進為夫人十二年加為皇太妃儀服一同太后十九年尊為皇太后稱崇訓宮安帝即位尊為太皇太后隆安四年崩葬修平陵神主祔於宣太后廟

宣太后簡

文帝母也

徐邈與范甯公書訪其事甯答謂子不得爵命母妃是太子婦號必也正名可以稱母也邈重與甯書曰禮天子之妃曰后闕雖稱后妃之德妃后之名可謂

大同所以憲章皇極禮崇物備者在於此也故太后之號定於前朝而當今所率由也若必欲服章同於后而名號異於妃則可因夫人之稱而加皇太以明尊雖曰一理然於文物之章猶未盡崇高之極此又今之所疑不可得而行也足下嫌太子妻稱妃然古無此稱出於後代今有皇太之別可例論邪

宋武帝受禪尊後母蕭氏為皇太后帝事太后孝謹即位時春秋已高每旦朝太后未嘗失時刻少帝即位尊

為太皇太后景平元年崩年八十一

宋武帝將崩手詔曰後世若有幼主朝事一委宰相母
后不煩臨朝

孝武即位尊母路淑媛為皇太后宮曰崇憲廢帝立為太
皇太后明帝立號崇憲太后乃居中宮崩

廢帝即位尊孝武王皇后為太后宮曰永訓其年崩後
廢帝即位尊明帝王皇后為皇太后宮曰弘訓順帝禪
位遷居丹陽宮拜汝陰王太妃順帝殂更立第都下薨

於第

後廢帝母陳氏既即位尊為皇太妃輿服一如晉孝武
李太妃故事宮曰弘化置家令一人改諸國太妃曰太
姬昇明初降為蒼梧王太妃

陳文帝即位尊武帝章皇后為皇太后宮曰慈訓廢帝
即位后為太皇太后光大二年后下令黜廢帝為臨海
王命宣帝嗣立太建元年復為皇太后崩年六十五
後主即位尊宣帝柳皇后為皇太后宮曰弘範陳亡入

長安隋大業十二年薨於東都年八十三

後魏太武即位尊明元杜皇后為皇太后封后弟為遼東王真君元年崩詔天下大臨三日別立后寢廟於陵所

獻文即位尊文成馮皇后為太后帝年十二居諒闇丞相乙渾謀逆后密定策誅之遂臨朝聽政內行不正寵李弈等獻文誅弈遂害獻文孝文時尊曰太皇太后復臨聽政孝文雅性孝謹事無巨細一稟於太后后多智

猜忍能行大事十四年崩年四十九孝文行三年喪

魏獻文帝好黃老浮屠之學雅薄富貴常有遺世之心
欲禪位於京兆王子推羣臣固諫任城王雲曰陛下方
隆太平臨覆四海豈得上違宗廟下棄兆民且父子相
傳其來久矣陛下必欲委棄塵務則皇太子宜承正統
中書令高允曰願陛下上思宗廟託付之重追念周公
抱成王之事帝曰然則立太子羣公輔之有何不可乃
傳位於太子下詔曰朕希心元古志存澹泊爰命儲宮

踐升大位朕得優游恭已栖心浩然羣臣奏曰昔漢高祖稱皇帝尊其父曰太上皇明不統天下也今皇帝幼冲萬機大政猶宜陛下總之謹上尊號曰太上皇帝從之上皇徙居崇光宮采椽不斷土堦而已國之大事咸以聞崇光宮在北苑中又建鹿野浮屠於苑中之西山與禪僧居之五年崩

明帝即位尊宣武高皇后為皇太后尋為尼居瑤光寺非大節慶不入宮中時天文有變靈太后欲以后當之

遂暴崩天下寃之喪還瑤光佛寺殯皆以尼禮

明帝尊母胡充華為皇太妃後尊為皇太后臨朝聽政
猶曰殿下後改令稱詔羣臣上書曰陛下自稱曰朕以
明帝冲幼未堪親祭欲依周禮夫人與君文獻之義代
行祭禮禮官博議以為不可而太后欲以幃幔自障觀
三公行事重問侍中崔光光便據漢和熹鄧后薦祭故
事太后大悅遂攝行初祀臨朝滛恣五年為元義所幽
又六年誅義復臨朝自是朝政疎緩恩威不立又三年

鳩孝明立孝文曾孫釗爾朱榮興兵向闕沉后於河
齊文宣受禪尊母婁妃為皇太后宮曰宣訓濟南即位
尊為太皇太后密與孝昭諸將誅楊愔等廢濟南立孝
昭復為皇太后孝昭崩又下詔立武成帝大寧二年崩
年六十二

武成即位四年傳位於太子緯自稱太上皇又四年崩
後主即位武成既崩尊武成胡后為皇太后后內行不
謹幸和士開及沙門曇獻等齊亡入周又恣行姦穢開

皇中殂

周武帝即位尊母叱奴氏為皇太后建德二年崩

宣帝即位尊武帝后阿史那氏為皇太后大象元年改為天元皇太后二年又尊為天元上皇太后宣帝崩靜帝尊為太后隋開皇二年殂年三十二又尊母李氏為帝太后大象元年改為天元帝太后又尊為太皇太后二年又尊為天元聖皇太后靜帝立尊為大帝太后隋開皇初出俗為尼八年殂以尼禮葬

宣帝既立一年傳位於太子闡自稱天元皇帝所居稱
天臺冕二十四旒車旂鼓皆倍於前王之數每對臣下
自稱為天用罇彝珪瓚以飲食令羣臣朝天臺者齊三
日清身一日自比上帝立五皇后二年而崩

天元崩靜帝時楊堅秉政尊天元楊后為皇太后居弘
聖宮堅既受禪后憤惋愈甚堅內甚愧之開皇中封為
樂平公主大業五年殂

靜帝母朱氏天元崩後尊為帝太后隋初出俗為尼

文獻通考卷二百五十一

欽定四庫全書

文獻通考卷二百五十二

鄱陽馬端臨貴與著

帝系考三

太上皇太皇太后皇太后

唐高祖武德九年詔禪位於皇太子稱太上皇上皇以
弘義宮有山林勝景雅好之貞觀三年四月乃徙居之
改為大安宮上屢請上皇避暑九成宮上皇以隋文帝

終於彼惡之乃營大明宮以為上皇清暑之所未成而上皇寢疾不果居九年崩

高宗崩太子即位詔軍國大事聽天后處分元年天后廢帝遷之房陵立睿宗幽於別宮五年自稱聖母神皇殺唐宗室諸王又二年自稱大周聖神皇帝以睿宗為皇嗣賜姓武氏追謚祖考為帝立武氏七廟封武三思等為王又十四年張柬之等奉中宗誅張易之張昌宗帝復位其年后崩

帝氏鳩弒中宗立殤帝為皇太后臨朝總庶政臨淄王
隆基舉兵誅之追廢為庶人

睿宗在位二年制傳位於太子太子上表固辭太平公
主勸上雖傳位猶宜總大政上乃謂太子曰汝以為天
下事重欲朕兼理之邪昔舜禪禹猶親巡狩朕雖傳位
豈忘國家其軍國大事當兼省之八月庚子元宗即位
尊睿宗為太上皇上皇自稱曰朕命曰誥五日一受朝
於太極殿皇帝自稱曰予命曰制勅日受朝於武德殿

三品以上除授及大刑政決於上皇餘皆決於皇帝明年七月上誅太平公主及其黨上皇誥自今軍國政刑一皆取皇帝處分朕方無為養志以遂素心是月徙居百福殿開元四年上皇崩

致堂胡氏曰睿宗每自謂素懷淡泊不樂世務然則盍不於傳位之時盡釋萬機則太平亦無所恃而謀亂乃有眷眷之情尚知大政昧於亢龍有悔之義是以不智處身而以不孝處其子也豈非後

王之戒哉

又曰元宗舉兵誅討韋氏雪君憤辱厥功雖大而意在自取不得已而歸之於父尋又怵惑邪說殺父同氣至使睿宗盡釋大權而問安視膳以天下養之事一無聞焉其友愛隆厚獨施之五王同寢共宴遊戲賞樂更奏絲竹親煮藥餌何其至也豈非以手足天性均出於父乎施諸手足者如此於父宜何如而孝養無聞五月而葬不太薄乎古之

人所以大過人者無他善推其所為而已元宗能其小而不能其大力於次者而忽於至者不推其所為無乃初心有利欲之蔽乎無乃感宋王之讓已而薄其父乎雖享國日久而天理好還終不可遁是故正其義不謀其利者為子則孝為臣則忠自天子至於庶人其揆一也

肅宗至德元年即位於靈武尊元宗曰上皇天帝靈武使者至蜀上皇喜曰吾兒應天順人吾復何憂制自今

改制勅為誥表疏稱太上皇四海軍國事皆先取皇帝
進止仍奏朕知俟克復上京朕不復預事命韋見素房
瑄崔渙奉傳國寶玉冊詣靈武傳位二年克復兩京使
韋見素入蜀奉迎上皇上皇至鳳翔從兵六百餘人上
皇命悉以甲兵輸郡庫上發精騎三千奉迎十二月丙
午上皇至咸陽上備法駕迎於望賢宮上皇在宮南樓
上釋黃袍著紫袍望樓下馬趨進拜舞於樓下上皇降
樓撫上而泣上捧上皇足鳴咽不自勝上皇索黃袍自

為上著之上伏地頓首固辭上皇曰天數人心皆歸於汝使朕得保養餘齒汝之孝也上不得已受之父老在仗外歡呼且拜上令開仗縱千餘人入謁上皇曰臣等今日復覩二聖相見死無恨矣上皇不肯居正殿曰此天子之位也上固請自扶上皇登殿尚食進食上品嘗而薦之丁未將發行宮上親為上皇習馬而進之上皇上馬上親執轡行數步上皇止之上乘馬前引不敢當馳道上皇謂左右曰吾為天子五十年未為貴今為天

子父乃貴耳左右皆呼萬歲上皇自開遠門入大明宮御舍元殿慰撫百官乃詣長樂殿九廟主慟哭久之即日幸興慶宮遂居之上累表請避位還東宮上皇不許時李輔國暴貴用事上皇左右皆輕之輔國意恨言於上曰上皇居興慶宮與外交通陳元禮高力士謀不利於陛下當為社稷計豈得徇匹夫之孝若迎居大內以杜絕小人上不應上元元年上寢疾輔國矯詔將五百騎露刃迎上皇遷居甘露殿上皇驚幾墜所留侍衛纔

廷老數十人流力士等於遠方輔國等詣上請罪上曰卿防微杜漸以安社稷何懼也自是上皇日以不懌辟穀成疾上初猶往問安既而但遣人起居寶應元年上皇崩

致堂胡氏曰靈武即位之事元宗既有傳位之命

則太子非叛也

范氏唐鑑謂肅宗以皇太子討賊遂自稱帝此乃太子叛父何以討

祿山也

其失在元宗命不亟行而裴冕諸人急於榮

貴是以致此咎也唐高祖睿元之為上皇非所欲

也勢可以釋位而不釋遂至逼迫不見幾故也而
太宗明肅不能少待或稱兵或借便皆有奪位之
惡欲速見小利故也父不父子不子昧於春秋首
惡誅之戒甚矣豈非後世之大鑒歟

又曰內寵嬖豎合而為一人主不悟又委信之其
終不至於篡弑逆亂者古無有也肅宗之事亦可
以為監矣夫祖考所為賢且德也子孫希之鮮能
及者非賢非德也子孫效之鮮不過焉兩漢而下

繼世之君往往樞前即位孰有為天子子親承大寶得問安侍膳舉四海之養以全其孝盡其樂如唐數君可謂千載一時不可逢之嘉會矣而太宗明皇肅宗之孝道無稱焉豈非自太宗失之歟高祖睿元晚節末路不免兵甲震驚之禍而元宗尤酷嗚呼悲夫輔國之言曰陛下當為社稷大計豈得徇匹夫之孝夫孝以奉父母為先然後上及於祖宗今父在也乃困其身怵其心而社稷是安此

中人以下所能辨者肅宗不察蓋自馬嵬西行輔國已有是言今又云爾是知肅宗為人可誘以利故也當是白刃脇遷盡去左右之人而居西內上皇辟穀成疾以致殂殞其異於趙武靈王沙邱之禍幾希矣夫以討賊之故奪父之位其終至於如此使安慶緒史朝義而有知豈不含笑於九泉元結頌唐中興曰盛德曰大業是過譽其始而未知其終也

順宗永貞元年德宗崩即位疾不能視事傳位太子純
稱太上皇憲宗元和元年太上皇崩

憲宗立尊順宗王皇后為皇太后十年崩年五十四

穆宗立尊憲宗郭后為皇太后敬宗立尊為太皇太后
宣宗立母鄭故侍兒有曩怨帝奉養后禮稍薄后鬱鬱
不聊太中二年暴崩

宣宗立尊母鄭妃為皇太后懿宗尊為太皇太后咸通
六年崩

敬宗立尊穆宗王后為皇太后文宗時稱寶歷太后太和五年宰相建白以太皇太后與寶歷太后稱號未辨前代詔令不敢斥言皆以宮為稱今寶歷太后居義安殿宜曰義安太后詔可會昌五年崩

文宗立尊母蕭氏為皇太后太和中懿安太后居興慶

宮

憲宗后文宗祖母

寶歷太后居義安殿

穆宗妃敬宗母

后居內殿

穆宗

妃文宗母

號三宮太后帝每五日問安及歲時慶謁率由複

道至南內羣臣及命婦詣宮門候起居有司獻四時新

物送三宮亦稱賜帝曰上三宮何可言賜遽索筆改賜為奉

按唐自肅宗張后之後未嘗有正位長秋者史所載皇后皆追贈其太后則皆所生子為帝而奉上尊號者也憲宗以郭汾陽孫女為妃既為令族又有淑德可以正位矣乃以其宗強恐既立之後後宮不得進遂終身為妃自後人主皆不立后然文宗崩既有太子仇士良等廢之而立武宗武宗崩

既有皇子諸宦官廢之而立宣宗宣宗崩遺命立
夔王王宗實等廢之而立懿宗雖當時中人專橫
今古所無然亦因椒房虛位宮闈無主所謂皇子
者皆無寵無威之人故上躬彌留之際宰輔既隔
在外庭中人遂得以肆行無忌顯違詔旨私立所
厚而莫由禁止也

昭宗為朱全忠所弑哀帝即位尊何后為皇太后徙居
積善宮號積善太后帝既禪位后亦遇害

後唐莊宗既即位冊尊母曹氏為皇太后而以嫡母劉氏為皇太妃往謝太后太后有慚色太妃曰願吾兒享國無窮使吾獲沒於地以從先君幸矣復何言哉帝既滅梁使人迎太后歸洛居長壽宮而太妃獨留晉陽同光三年五月太妃薨七月太后薨謚曰貞簡葬坤陵而太妃無謚葬魏縣太妃與太后甚相愛其送太后於洛也涕泣而別太妃既卒太后悲哀不飲食月餘亦崩

愍帝即位冊尊明宗后曹氏為皇太后淑妃王氏為皇

太妃而敬瑭兵犯京師廢帝與太后俱自燔死晉高祖
立遷太妃於至德宮高祖后事妃如母乃封其所養子
許王從益為郇國公以奉唐祀契丹犯京師召從益與
妃德光北歸留蕭翰守汴州漢高祖起太原翰欲北去
乃使人召從益迫以來令權知南朝事漢高祖擁兵而
南妃及從益遣人迎之既而俱遇害

晉出帝即位尊高祖后李氏為皇太后契丹入汴北遷
歿於北地建州 安太妃出帝母即位冊為太妃北遷

歿於虜地

漢愍帝即位尊高祖后李氏為皇太后周太祖入京師
舉事皆稱太后誥已而議立湘陰公贇為天子未至請
太后臨朝已入太祖出征軍士擁之以還太祖請事太
后如母於是遷於太平宮上尊號曰昭聖皇太后顯德
元年春崩

周太祖皇后柴氏無子養后兄守禮之子以為子是為
世宗守禮字克讓以后族拜銀青光祿大夫檢校吏部

尚書兼御史大夫世宗即位加金紫光祿大夫檢校司空光祿卿致仕居於洛陽終世宗之世未嘗至京師而左右亦莫敢言第以元舅禮之守禮頗恣橫嘗殺人於市有司以聞世宗不問時王溥王晏王彥超韓令坤等同時將相皆有父在洛陽與守禮朝夕往來惟意所為洛陽人多畏避之號十阿父守禮卒年七十二官至太傅

歐陽公史論曰父子之恩至矣孟子言舜為天子

瞽瞍殺人則棄天下竊負之而逃以為天下可無
舜不可無至公舜可棄天下不可刑其父此為世
立言之說也然事固有不得如其意者多矣蓋天
子有宗廟社稷之重百官之衛朝廷之嚴其不幸
有不得竊而逃則如之何而可予讀周史見守禮
殺人世宗寢而不問蓋天下重矣而子於其父亦
至矣故寧受屈法之過以申父子之道其所以合
於義者蓋知權也君子之於事擇其輕重而處之

耳失刑輕不孝重也刑者所以禁人為非孝者所以教人為善其意一也孰為重刑一人未必能使下無殺人而殺其父滅天性而絕人道孰為重權其所謂輕重者則天下雖不能棄而父亦不可刑也然則為舜與世宗者宜何如無使瞽瞍守禮至於殺人則可謂孝矣

周恭帝即位尊世宗皇后符氏為皇太后宋太祖既受禪遷居西宮號周太后太平興國初入道為尼淳化四

年殂

宋昭憲皇太后杜氏定州安喜人太祖之母帝受禪尊為皇太后建隆二年六月崩

真宗即位尊太宗明德李后為皇太后居西宮嘉慶殿景德元年崩

仁宗即位尊真宗莊獻明肅皇后為皇太后軍國大事權取處分宰相丁謂等請太后所御殿太后曰皇帝視事當朝夕在側何須別御一殿於是請太后與帝五日

一御承明殿帝位在太后位右垂簾決事議已定太后
忽出手書第欲禁中閱章疏遇大事即召對輔臣其謀
出於丁謂非太后意也謂既貶馮拯等三上奏請如初
議始御承明殿有司請制令稱吾以生日為長寧節出
入御大安輦鳴鞭侍衛如乘輿天下皆避太后父諱羣
臣上尊號曰應元崇德仁壽慈聖太后元日帝率百官
上壽謁太廟乘玉輅服袞衣明道二年崩

天聖二年七月宰臣王欽若等拜表請上皇太后尊

號曰應元崇德仁壽慈聖皇太后命宰臣王曾撰冊
文參知政事魯宗道書冊寶十一月郊祀禮畢帝御
大安殿受冊百僚稱賀畢甫序班侍中奏外辦禮儀
使奏請發皇太后尊號冊寶皇帝服承天冠絳紗袍
以出殿中監進珪禮儀使與閣門使前導皇帝隨冊
寶降西階內臣主當職掌捧正殿庭置於東向褥位
禮儀使奏請皇帝再拜在位官皆再拜

應行事公卿
執事者不拜

再拜訖太尉司徒就受冊寶位皇帝搢圭跪捧冊授

太尉太尉措笏東向側身跪受其冊文曰嗣皇帝臣

仁宗御名謹再拜稽首言恭以為天下之母者愛育之功

博居域中之大者覆載之道均乃有飾盛禮以推崇
因強名而不顯以恩則尊親偕極以義則中外一辭
表德垂鴻非可以缺況乎寧保基緒撫覽權綱格萬
宇之治平副輿情之輸戴式隆稱號以播休鑠伏惟
皇太后陛下聰明淑哲淵穆懿恭襲御龍之遐源啓
曾沙之瑞命輔佐先聖輯睦藩房申翊宮朝協敷聞

教服圖史之至戒慕黃老之微言及正宮承天居尊
治內勤儉之化式於中闡和平之風被于四表王基
允固睿問載融曩者號弓在辰仍几有命粵以大寶
付於菲躬煢煢哀荒懼罔攸濟實賴慈蔭以授洪圖
上奉顧託之明俯慰遐邇之望詳錄機務咨謀政經
憲祖宗之舊章厲官師之凝績本乎子物之惠濟乃
守成之業方今蠻夷款服封宇靖安百度聿修六氣
時若肇禋肆類克展上儀享是休嘉率由保翼故得

公卿庶尹藩嶽守臣武旅戎酋緇黃耄艾咸謂周有
思齊之什播於聲歌漢有長樂之謠垂於竹帛斟酌
前訓擬議盛猷允非鴻名莫揚茂烈綿代曠典自我
而著猶且推美而弗有約已以至謙連袂叩閭露章
五請臣等以因人之欲拜跪於內甫迴冲慮乃徇公
言夫含章履順之謂應元詔訓逮下之謂崇德體仁
所以膺壽臧之福宣慈所以隆聖善之懿不勝大願
謹與百僚士庶奉玉冊琮寶上尊號曰應元崇德仁

壽慈聖皇太后伏惟懋協歡心誕膺洪冊承七廟之

流祥受九旻之敷錫擁佑家邦祉祚無極臣

仁宗御名誠

懽誠抃稽首頓首謹言又捧寶授司徒如授冊儀皇

帝歸御幄改常服乘輿赴文德殿後幄百官班退並

赴朝堂幕次太尉司徒奉冊寶至文德殿門外下奉

安文武羣官宗室客使並集於文德殿中書門下翰

林學士兩省御史臺並立於階下香案前殿侍中奏

中嚴外辦皇太后服儀天冠袞衣以出奏隆安之樂

行障步障方團扇侍衛垂簾即御座南向樂止太常
卿前導冊案前至殿西階下太常卿以下各歸位典
儀曰再拜在位者皆再拜分班東西序立吏部侍郎
押冊案禮部侍郎押冊升進至褥位當御座前訖太
尉跪奉冊案稍前中書令讀冊訖奉冊丞北向進至
於御座前訖中書令舉冊官俱降還位太尉降階納
烏帶劔訖侍中押寶案司徒捧寶侍中讀寶並如讀
冊之儀畢置於御座前冊之南訖司徒太尉詣香案

前分班東西序立尚宮詣皇帝御座前奏請皇帝詣

皇太后御座前行稱賀之禮皇帝服鞞袍簾內詣皇

太后御座前奏請再拜訖跪賀曰嗣皇帝臣

仁宗名

言

皇太后陛下顯崇徽號昭渙寰瀛伏惟與天同壽率

土不勝欣抃伏興又再拜尚宮詣御座承旨答曰

皇帝孝思至誠貫於天地受茲徽號感慰良深宣答

訖皇帝再拜歸御座幄太尉率文武百僚詣皇太后

御座前稱賀侍中承旨宣答訖在位官俱再拜禮畢

奏隆安之樂皇太后降座還幄次樂止侍中奏解嚴
所司放仗文武百僚並再拜訖退皇帝皇太后還內
應外命婦稱賀皇太后皇帝於內殿在外命婦及兩
京留司官並奉表稱賀

石林葉氏曰母后加謚自東漢始本朝后謚初止
二字明道中以章獻明肅嘗臨朝特加四字元豐
中慶壽太皇太后上仙章子厚為謚議請於朝詔
以太皇太后功德盛大四字猶懼未盡始仍故事

遂謚慈聖光獻自是宣仁聖烈與欽聖憲肅皆四

字云

章獻太后崩遺詔以皇太妃楊氏為皇太后居宮中參
斷軍國事御史中丞蔡齊白執政以為不可乃詔勿頒
預政遺詔第存后號即所居殿號曰保慶太后景祐三
年崩

英宗即位尊仁宗慈聖光獻皇后為皇太后帝感疾請
權同處分軍國事御內東門小殿聽政帝康復乃撤簾

勅有司崇峻典禮下令稱聖旨神宗立尊為太皇太后
名宮曰慶壽元豐二年崩

神宗立尊英宗宣仁聖烈皇后為皇太后居寶慈宮哲
宗嗣位尊為太皇太后同御延和殿詔書稱吾以生日
為坤成節令天下避后父諱元祐八年崩

元豐八年三月哲宗即位太皇太后權同聽政三省
樞密院按儀注未釋服已前遇隻日皇帝御迎陽門
日參官並赴起居依例奏事每五日遇隻日於迎陽

門垂簾皇帝坐於簾內之北宰臣執政官升殿奏事
權屏去左右侍衛事有幾速許非時請對及賜宣召
亦許升殿禮部御史臺閤門奏討論御殿及垂簾儀
制每朔望六參皇帝御前殿百官起居三省樞密院
奏事應見謝辭班退各令詣內東門進榜子皇帝雙
日御延和殿垂簾日參官起居太皇太后移班少西
起居皇帝並再拜三省樞密院奏事三日已上四拜
不舞蹈候祔廟畢起居如常儀簾前通事以內侍殿

下以閤門吏部磨勘奏舉人垂簾日引應見辭謝臣僚遇朔望參日不坐並先詣殿門次內東門應擡賜者並門賜從之是月帝御迎陽門幄殿同太皇太后垂簾宰臣親王以下合班起居常例分班十六至是合班以閤門奏請故也四月三省樞密院言續討論垂簾故事儀注應合告謝臣僚並垂簾日引依閤門見行儀制從之八月御史中丞黃履言朔望皇帝御前殿合赴起居官次日赴延和殿垂簾起居從之元

祐元年閏二月右諫議大夫孫覺右諫議蘇轍進對
有旨俟簾下內臣盡出方得敷奏

哲宗立尊神宗欽聖憲肅皇后為皇太后哲宗崩決策
迎立徽宗帝請權同處分軍國事辭帝固請乃從令外
間不避家諱不立誕節名不通使遼國輔臣不於小殿
奏事纔六月即還政明年崩

元符三年正月徽宗即位皇太后權同聽政三省樞
密院聚議故事嘉祐末英宗請慈聖同聽政五月同

御內東門小殿垂簾至七月十三日英宗問曰御前
後殿輔臣奏事退詣內東門簾前覆奏明年手書還
政又故事惟慈聖不立生辰節名不遣使契丹若天
聖元豐則御殿垂簾立誕節名遣使與北敵往還及
避家諱等曾布曰今上長君豈可垂簾聽政請如嘉
祐故事施行蔡卞曰天聖元豐與今日皆遺制處分
與嘉祐末英宗請聽政不同布曰今日之事雖載於
遺制實出自德音又皆長君正與嘉祐事相似既奏

得旨並依嘉祐治平政事施行布又謂同列曰奏事
先奏太后次覆奏皇帝如今日所得指揮遂為定式
皇太后手詔付中書省曰皇帝踐祚之初勉從勤請
非久便當退歸房闈除不御前後殿已指揮外如避
家諱等並勿行

哲宗立尊生母朱德妃為皇太妃時宣仁欽聖二太后
皆居尊故稱號未得其極至元祐三年宣仁詔母以子
貴興蓋仗衛冠服悉侔皇后紹聖中欽聖復即閤建殿

改乘車為輿上設行龍出入由宣德門百官上牋稱殿下名所居為聖瑞宮崇寧初崩追尊為皇后

靖康二年二帝北狩金人僭立張邦昌邦昌迎哲宗元祐皇后入禁中垂簾聽政后遣使迎康王降手書播告天下王即位於南京后撒簾上尊后為元祐太后奉迎至行在所以元字犯后祖諱改稱隆祐太后從上幸維揚幸杭州苗傅劉正彥作亂請后聽政上復辟撒簾建炎三年避敵如虔州紹興元年崩

徽宗既立尊哲宗元符皇后為皇太后殿為崇恩宮政和三年暴崩

徽宗宣和七年十二月上內禪以道君號退居龍德宮皇太子即皇帝位尊道君為太上皇帝靖康元年上皇如南京避敵到鎮江三月兵退命李綱迎上皇於南京十一月京城失守二年二月上皇北狩紹興五年崩於五國城

欽宗既受禪尊徽宗顯肅皇后為太上皇后遷居寧德

宮稱寧德太后京城失守從上皇北遷留于彼五年崩
高宗既即位遙尊母章賢妃為宣和皇后紹興十年遙
上皇太后冊寶於慈寧殿自後每遇誕日至朔皆遙行
賀禮十二年八月始自北歸至臨安入居慈寧宮二十
九年崩

紹興三十二年六月上內禪稱太上皇退處德壽宮八
月加上尊號為光堯壽聖太上皇帝乾道七年再加上
尊號為光堯壽聖憲天體道太上皇帝淳熙二年再加

上尊號為光堯壽聖憲天體道性仁誠德經武緯文太
上皇帝是年以聖壽七十行慶壽禮十二年再加紹業
興統明謨盛烈八字十三年以聖壽八十行慶壽禮赦
天下十四年冬十月崩

三十二年六月十一日內禪十二日上詣德壽宮欲
以是日率百官朝太上皇於德壽殿以雨百僚免入
見上就宮中行禮自後上詣宮行禮即不集百官陪
十三日詔令宰臣率百官於初二日十六日詣德壽

宮起居又詔朕欲每日一朝德壽宮面奉慈旨恐廢萬幾煩群下不許如前代朔望之禮太簡令禮官重定其期禮部請依漢高帝五日一朝太公故事每五日一詣德壽宮朝見如宮中禮從之乃詔自今後詣德壽宮惟經過官司起居餘並免十七日太上宣諭車駕每至宮必於門外降輦既行家人之禮自宜至殿上降輦又不須五日一朝只朝朔望於是有司請除朔望朝外於每月初八日二十二日詣德壽宮起

居如宮中儀從之自後皆遵此制如值雨及盛暑祁
寒臨期承太上特旨仍免詣十二月冬至上詣德壽
宮稱賀上壽禮畢入見太后如宮中之儀

自後正
至並同

乾

道元年二月朔上詣德壽宮請太上太后至延祥觀
燒香次幸聚景園次幸玉津園太上聖旨日晚免車

駕從還德壽宮臣僚止從駕還內沿路並免起居

除
管

軍官從駕外執
政官以下並免

以後或恭請幸南內或幸聚景園玉

津園延祥觀靈隱天竺寺其儀並同

皇帝朝德壽宮儀注

前期儀鑾司設大次於德壽宮門內小次於殿東廊西
向其日俟皇帝出即御座從駕臣僚禁衛等起居如常
儀皇帝降御座乘輦將至德壽宮報文武百僚詣宮門
外迎駕起居訖前導官太常卿閤門官太常博士禮直
官先入詣大次前分左右立定俟皇帝詣德壽宮大次
降輦入次御史臺閤門太常寺報文武百僚入詣殿庭
北向立定前導官導皇帝入小次簾降俟太上皇帝即

御座小次簾捲前導官導皇帝升殿東階詣殿上折檻
前奏請拜皇帝再拜訖前導官導皇帝稍前躬奏聖躬
萬福訖導皇帝復位又奏請拜皇帝再拜訖導皇帝詣
太上皇帝御座之東西向立前導官於殿上隨地之宜
少立揖班首以下躬典儀曰拜贊者承傳曰拜在位官
皆再拜訖直身措笏躬身三舞蹈跪左膝三叩頭出笏
就一拜又兩拜拜訖且躬身班首不離位奏聖躬萬福
訖典儀曰拜贊者承傳曰拜在位官皆再拜又兩拜拜

訖直立身捲班出前導官以次退

從駕官歸幕次以俟從駕還內

太上

皇帝駕興皇帝從入見太上帝后如宮中之儀訖以俟

皇帝還內如來儀

每遇正旦冬至及朔望並依上儀

淳熙二年十一月詔太上皇帝聖壽無疆新歲七十用

十一月冬至加上尊號冊寶十二月十七日立春行慶

壽禮是日早文武百僚並簪花赴文德殿立班聽宣慶

壽赦赦文太極之功不宰其可贊者兩儀之生大明之

照無疆所能推者千載之至欽惟聖父誕保我家二百

餘載而中天定神器於欽側艱虞之始三十六年而宅
位授朕師於康強暇豫之時上穹綿有永之年下土洽
無為之化興言非質日侍慈顏竭幅員之富而未足伸
至養之誠極尊美之稱而未足表難名之德茲載新於
歲律庸展慶於耆齡前殿奉卮企高皇而踵武大安進
膳邁貞觀之彌文鏘金奏以充庭儼臣工而在列和氣
遒周於宇宙盛容創見於古今仍內奉於母儀庸備殫
於子道為酒以介眉壽誕膺純嘏之常立春而下寬書

更廣庶民之富可大赦天下於戲建無窮之基則享無窮之樂命方僕於萬年有非常之事則修非常之休恩盍推於四海矧羣黎百姓夙依於覆育而耆老大夫咸自於甄陶今而仁壽之同躋必也安榮之共保諒爾有邦之衆知予錫類之心赦書日行五百里敢以赦前事言者以其罪罪之主者施行宣赦訖從駕官並赴後殿起居謝花再拜從駕至德壽宮行慶壽禮

陳設

前期儀鑾司陳設德壽宮殿上當中南向設大次於德壽宮內南向小次於殿東廊西向設皇帝褥位二一於御座之東西向一於御座之南北向尚醞設御酒器於御座之東有司又設御茶床於御座之西俱稍北

上壽

其日後殿入官喝排立俟催班立定

應從駕應奉宮禁衛等並簪花不係

從駕官徑赴德壽宮並簪花以俟迎駕起居

問門報班齊皇帝服鞞袍出宮

門禁衛諸班親從等並迎駕自贊常起居自贊謝花兩

拜入內省執骨采使臣迎
駕常起居謝花兩拜

皇帝座知閣門以下御帶環

衛官諸司祇應官等一班關班宣名常起居次贊謝花

兩拜訖知閣門官升殿讀奏目

餘官並退

次舍人引應從駕

官一班赴當殿宣名常起居次贊謝花兩拜

執政有奏事如儀皇

太子內中起居簪花以俟從駕

次管軍一班宣名常起居次贊謝花兩

拜訖皇帝升輦將至德壽宮文武百僚迎駕常起居贊

謝花兩拜訖前導太常卿閣門官太常博士禮直官并

管軍御帶環衛官等詣大次前分左右立文武百僚入

詣德壽殿下東西相向立俟皇帝至大次降輦入次簾降簪花服鞞袍閣門御史臺太常寺分引皇太子以下應從駕官入詣德壽殿下東西相向立大次簾捲前導

官前導皇帝入小次簾降

前導太常卿閣門官太常博士禮直官并管軍御帶環衛

官等俟太上皇帝出官迎太上皇帝四拜起居

太上皇帝出宮行門禁衛諸班

親從等迎太上皇帝自贊常起居太上皇帝升御座鳴鞭小次簾捲前導官前導皇帝升殿東階詣殿上折檻前北向褥位奏請拜皇帝再拜訖躬奏聖躬萬福訖又

奏請拜皇帝再拜訖前導皇帝詣太上皇帝御座之東
褥位西向立前導官於殿上隨地之宜立閣門御史臺
太常寺分引皇太子并文武百僚並橫行北向立舍人
揖皇太子以下躬典儀曰拜贊者承傳在位官皆再拜
搢笏舞蹈又再拜訖且躬身班首不離位奏聖躬萬福
訖典儀曰拜贊者承傳在位官皆再拜訖直身立分東
西相向立禮直官引奉盤盞參知政事受盤盞參知政
事承旨宣答簽書樞密院事奏禮畢戶部尚書殿中監

少監升殿東階

奉盤盞參知政事受盤盞參知政事殿中監少監詣酒稍北南向立承旨宣答

簽書樞密院事并奏禮畢戶部尚書詣折檻之東西向立

舍人通樂人姓名已下四

拜起居次看盞人稍前贊拜兩拜贊上殿祇候內特進

御茶床殿侍酌酒訖尚醞典御以盤盞酒注授殿中監

少監次禮直官引奉盤盞參知政事詣酒樽所北向搢

笏殿中監奉盤盞參知政事捧盤盞西向立殿中監啓

盞殿中少監以酒注於盞奉盤盞參知政事奉酒詣皇

帝前北向

禮直官引受盤盞參知政事詣太上皇帝御座前西向立定

閣門御史臺

太常寺分引皇太子并文武百僚橫行北向立俟奉盤
盞參知政事躬進皇帝皇帝奉酒詣太上皇帝御座前
躬進訖少後受盤盞參知政事躬接訖復授奉盤盞參
知政事前導官導皇帝詣御座前褥位北向俛伏跪殿
下皇太子并百僚並躬身皇帝致詞曰皇帝臣御名稽首
言天祐君親錫茲難老維春之吉年德加新臣御名與羣
臣等不勝大慶謹上千萬歲壽伏興奏請拜皇帝再拜
典儀曰拜贊者承傳在位官皆再拜訖直身立分東西

相向立前導官導皇帝詣御座東西相向立奉盤盞參

知政事以盤北向躬進皇帝訖

奉盤盞參知政事復位立

皇帝奉盤

詣御座東西向立樂作俟太上皇帝飲酒訖皇帝躬接

盞樂止少後受盤盞參知政事躬接訖以授尚醞典御

各復位立閣門御史臺太常寺分引皇太子并文武百

僚橫行北向立前導官導皇帝詣褥位北向奏請拜皇

帝再拜典儀曰拜贊者承傳在位官皆再拜訖直身立

前導官導皇帝詣御座之東褥位西向立舍人揖皇太

子已下躬典儀曰拜贊者承傳在位官皆再拜搢笏舞
蹈又再拜訖直身立內侍舉御茶床禮直官引戶部尚
書詣御座前北向俛伏跪奏具官臣某言禮畢伏興退
復位立典儀曰拜贊者承傳在位官皆再拜訖直身立
分相向立次舍人贊樂人謝祇應兩拜訖太上皇帝駕
興皇帝從入宮文武百僚前導應奉官等以次退皇帝
皇太子入賀太上皇后於宮中行禮執政率文武百僚
拜牋賀太上皇后訖以俟駕興從駕并應奉官禁衛等

並簪花從駕還內

建炎以來朝野雜記昭慈聖獻皇后之在建康也

有司月奉千緡而止后生辰別奉緡錢萬時朝廷

用度不給故其禮不及承平時其後顯仁后自北

來歸歲奉錢二十萬緡

月奉萬緡冬年寒食生辰倍之

帛二萬餘

疋

生辰絹萬疋春冬端午各三千疋綾羅二千疋

冬綿五千兩酒日一斗

羊三牽高宗在德壽宮孝宗命有司月供十萬緡

高宗以養兵多費詔減其六萬及孝宗在重華命

月進三萬緡而已上受禪詔太皇太后月奉緡錢
二萬皇太后萬五千上皇太后五萬而重華別給
二萬焉

右光堯之壽社壽皇之孝養古今罕儷故具載其
事於此

孝宗既受禪尊憲聖皇后為皇太后居德壽宮上尊號
曰壽聖太上皇后每遇誕節上詣宮上壽至朔望朝上
皇畢入見后如宮中之儀乾道七年加壽聖慈明尊號

淳熙二年以上皇慶壽禮又加號壽聖齊明廣慈十年
后年七十行慶壽禮十三年加尊號備德二字上皇崩
遺詔改稱皇太后上欲迎還大内太后以上皇几筵在
德壽宮不許因築本殿名慈福光宗即位后當為太皇
太后以壽皇故更號曰壽聖皇太后紹熙四年慶壽八
十加號隆慈備福孝宗崩始稱太皇太后光宗疾不能
行喪禮宰臣請后於壽皇梓宮前垂簾宣光宗手批立
寧宗慶元元年加尊號光祐二字二年遷居重華宮易

名曰慈福三年崩

容齋洪氏隨筆曰唐德宗即位訪求其母沈太后
歷順宗及憲宗時曾祖母故稱為曾太皇太后蓋
別於祖母也舊新二唐書紀皆載之今慈福太皇
太后在壽康太上時已加尊稱若於主上則為曾
祖母當用唐故事加曾字向者嘗已告宰相而省
吏以為典故所無天子建事三世安得有前比亦
可謂不知禮矣又嗣濮王士欽在隆興為從叔祖

在紹熙為曾叔祖慶元為高叔祖矣而仍稱皇叔祖如故士歆視嗣秀王伯圭為從祖今圭稱皇伯祖而歆但為皇叔祖乃是弟爾禮寺亦以為國朝以來無稱曾高者彼蓋不知累朝尊屬元未有之也

淳熙十六年二月內上禪皇太子即位移御重華宮上尊號曰至尊壽皇聖帝至紹熙五年崩

光宗既受禪上成肅皇后尊號曰壽成皇后孝宗崩上

皇太后尊號慶元初加號惠慈嘉泰二年上太皇太后尊號

紹熙五年六月壽皇崩光宗以疾不能行喪禮七月憲聖太皇太后命皇子嘉王即皇帝位尊光宗為太上皇居泰安宮

以內中寢殿為之

慶元元年上尊號曰聖安壽仁六

年崩

寧宗既即位尊慈懿皇后為皇太后退居壽康宮慈寧殿上尊號曰壽仁慶元六年崩

文獻通考卷二百五十二

欽定四庫全書

史部

文獻通考卷二百五十三

詳校官內閣學士臣瑞保

編修臣程嘉謨覆勘

覆校官中書臣孫希旦

校對官中書臣王彞憲

謄錄監生臣史廷爽

欽定四庫全書

文獻通考卷二百五十三

鄱陽馬端臨 貴與著

帝系考四

后妃

皇太子妃及後宮冊后妃及冊太子妃禮儀

黃帝娶於西陵之女

西陵國名也

是為嫫祖

祖一作俎嫫力追反索隱曰一

曰雷祖音力誰反正義曰一作嫫

嫫祖為黃帝正妃

索隱曰按黃帝立四妃象后妃四星

皇甫謐云元妃西陵氏女曰嫫祖生昌意次妃方雷氏

女曰女節生青陽次妃彤魚氏女生夷鼓一名蒼林次

妃嫔母班在三人之下按國語夷鼓蒼林是二人又按漢書古今人表彤魚氏生夷鼓嫫母生蒼林不得如謚說生二子其後皆有天下其一曰元囂是為青陽太史

據大戴禮以嫫祖生昌意及元囂則青陽也皇甫謐以青陽為少昊乃方雷氏所生是其所見異也索隱曰元囂帝嚳之祖按皇甫謐及宋衷皆云元囂青陽即少昊也今此紀下云元囂不得在帝位則太史公意青陽非少昊明矣而此又云元囂是為青陽當是誤也謂二人皆黃帝子並列其名所以前史因誤以元囂青陽一人耳宋衷又云元囂是為青陽少昊繼黃帝立者而史不叙蓋少昊以金德王非五運之次故叙五帝不數之也青陽降居江水其二曰昌意降居若水降下也言帝子為諸侯降居江水若水二國皆在蜀即所封國也昌意娶蜀山氏女曰昌僕生高陽高

陽有聖德焉

正義曰華陽國志及十三州志云蜀之先肇於人皇之際黃帝與子昌意娶蜀山氏

後子孫因封焉帝顓頊高陽氏黃帝之孫昌意之子母曰昌僕亦謂之女樞河圖云瑤光如蜺貫月正白感女

樞於幽房之宮生顓頊

首戴干戈有德文也

帝嚳有四妃卜其子皆有天下元妃有邠氏女曰姜嫄

生后稷次妃有娥氏女曰簡狄生高次妃陳豐氏女曰

慶都生放勳次妃姬訾氏女曰常儀生帝摯

帝嚳崩帝摯代立摯

在位九年政微弱弟唐侯放勳德盛乃禪位焉

唐堯娶散宜氏之女曰女皇生丹朱又有庶子九人皆

不肖

虞舜娶堯之二女長娥皇次女英舜升天子娥皇為后
女英為妃娥皇無子女英生商均

夏禹娶塗山氏之女生啟

商湯妃有莘氏之女

周太王娶有邰氏之女曰太姜

詩古公亶父來朝走馬率西水滸至于岐下爰及姜

女聿來胥宇

王季娶摯任氏之中女

正義曰國語注摯疇二國任姪
美仲仲虺之後太任之家太任

王季之妃
文王母也

詩摯仲氏任自彼殷商來嫁于周曰嬪于京乃及王
季維德之行太任有身生此文王 思齊太任文王

之母思媚周姜京室之婦

齊莊媚愛也周姜太姜也
京周地也常思莊敬太任

也乃為文王之母又常思愛太姜之配太王之禮
故能為京室之婦言其德行純備故生聖子也

列女傳太姜太王娶之以為妃生太伯仲雍王季太
姜有色而貞順率導諸子至於成童靡有過失太王

謀事必於太姜遷徙必與太任王季娶之以為妃太
任之性端壹誠莊維德之行及其有身目不視惡色
耳不聽淫聲口不出傲言能以胎教子而生文王此
皆有賢行也

文王娶有莘氏之長女曰太姒

詩文王初載天作之合在洽之陽在渭之涘文王嘉

止大邦有子大邦有子倪天之妹

倪譬也知太姒之賢而尊之如天之

有女弟

文定厥祥

問名之後卜而得吉則文王以禮定其吉祥謂納幣也

親迎于

渭造舟為梁不顯其光

不明乎其禮之有光輝美之也天子造舟周制也殷時未

有此等制

有命自天命此文王于周于京續女維莘長子

維行

天將命文王君天下於周京之地故亦為作合使繼太任之女事於莘國莘國之長女太姒則

配文王維德之行

篤生武王保祐命爾變伐大商

變和也謂協和伐殷

之事太姒嗣徽音則百斯男

太姒十子衆妾則宜百子也箋云徽美也嗣太

任之美音謂續行其善教令

惠于宗公神罔時怨神罔時恫

宗公宗神

也惠順也

刑于寡妻至于兄弟以御于家邦

刑法也寡妻適妻也箋云

寡妻寡

有之妻

武王娶邑姜

服虔曰邑姜武王后太公之女也

論語武王曰予有亂臣十人

十人謂周公旦召公奭太公望畢公榮公太顛

闕夭散宜生南宮适其一人謂文母劉侍讀以為子無臣母之義蓋邑姜也九人治外邑姜治內亂治也
孔子曰才難不其然乎唐虞之際於斯為盛有婦人焉九人而已

史記武王與叔虞母會時夢天謂武王曰余命女生子名虞余與之唐及生子文在其手曰虞故命之曰虞

曲禮天子有后有夫人有世婦有嬪有妻有妾

妻八十
一御妻

周禮謂之女御以其御序於王之燕妾賤者疏夫扶也扶持於王婦服也言其進以服事君子也以其猶貴故加以世婦言之亦廣世允也嬪婦人之美稱可賓敬也妻之言齊也言進御於王之時暫有齊同之義妾之言接也聞彼有禮走而往焉以得接見於君子也周禮則嬪在世婦上又無妾之文也今此所陳與周禮雜而不次者記者之言或雜夏殷而言之鄭注檀弓云舜不告而娶不立正妃但三夫人夏則因而廣之增九女則十二人所增九女者則九嬪也故鄭云春秋說云天子娶十二人夏制鄭又云殷增三九二十七人總三十九人所謂二十七世婦也周又三二十七人因為八十一人則女御也注周禮至賤者正義曰解周名為女御之義以其御於王之燕寢御女按周禮王有六寢一是正寢餘五在後通為燕寢其一在東北王春居之一在

西北王冬居之一在西南王秋居之一在東南王夏居之一在中央六月居之凡后妃以下更為次序而上御王於五寢之中也故鄭注周禮九嬪云凡御見之法月與后妃其象也卑者宜先尊者宜後女御八十一人當九夕世婦二十七人當三夕九嬪九人當一夕三夫人當一夕后當一夕亦十五日而徧云自望後反之婦人上御必有女史彤管以差次之后妃羣妾以禮御於君所女史書其日月授之環以進退之生子月辰則以金環退之當御者以銀環進之著左手既御著於右手事無小大記以成法

昏義古者后立六宮三夫人九嬪二十七世婦八十一御妻以聽天下之內治以明章婦順故天下內和而家理天子立六官三公九卿二十七大夫八十一元士以

聽天下之外治以明章天下之男教故外和而國治故

曰天子聽男教后聽女順天子理陽道后治陰德天子

聽外治后聽內治教順成俗外內和順國家理治此之

謂盛德

天子六寢而六宮在後六宮在前所以成副施內外之政也三夫人以下百二十人周制也三

公以下百二十人似夏制也合而言之取其相應有象天數也內治婦學之法也陰德謂主陰事陰令也正

義曰按宮人云掌王之六寢之修注路寢一小寢五是

天子六寢也云六宮在後者后之六宮在王之六寢之

後亦大寢一小寢五其九嬪以下亦分居之其三夫人

雖不分居六宮亦分主六宮之事或二宮則一人也或

猶如三公分主六卿之類也云內治婦學之法也者按

九嬪職云掌婦學之法故知內治是婦學也云陰德謂

主陰事陰令也者按內宰掌王之陰事陰令注云陰事謂羣妃御見之事陰令為王所求為於北宮也

周宮內宰以陰禮教六宮

鄭司農云陰禮婦人之禮六宮後五前一王之妃百二十

人后一人夫人三人嬪九人世婦二十七人女御八十一人言謂六宮謂后也婦人稱寢曰宮宮隱蔽之言后

象王立六宮而居之亦正寢一燕寢五教者不敢斥言之謂之六宮若今稱皇后為中宮矣以陰禮

教六嬪

教之以婦人之禮不言教夫人世婦者舉中省文也

以婦職之法教九御

使各有屬以作二事正其服禁其竒衺展其功緒

婦職謂織

維組紉縫線之事九御女御也九九而御於王因以號為使之九九為屬同時御又同事也正其服止踰侈竒衺若今媚道展猶錄也緒業也故書二為大祭祀后裸三杜子春云當為二二事謂絲枲之屬也

獻則贊瑤爵亦如之

謂祭宗廟王既裸而出迎牲后乃從後裸也祭統曰君執圭瓚裸尸

大宗執璋瓚亞裸此大宗亞裸謂夫人不與而攝耳獻謂王薦腥薦熟后亦從獻也瑤爵謂尸卒食王既醕尸后亞獻之其正后之服位而詔其禮樂之儀
薦徹之禮爵以瑤為飾
當與樂相

應位謂房中戶內及阼所立處
贊九嬪之禮事

助九嬪贊后之事九嬪者贊后薦玉齋薦徹豆

籩音咨

凡賓客之裸獻瑤爵皆贊

謂王同姓及二王之後來朝覲為賓客者

裸之禮亞王而禮賓獻謂王享燕亞王獻賓也瑤爵所以亞王酬賓也坊記曰陽侯殺穆侯而竊其夫人故大饗廢夫
致后之賓客之禮
謂諸侯來朝覲及女賓之賓客
凡喪事佐后

使治外內命婦正其服位

使使其屬之上士內命婦謂九嬪世婦女御鄭司農云外

命婦卿大夫之妻王命其夫后

凡建國佐后立市設其

次置其叙正其肆陳其貨賄出其度量淳制祭之以陰

禮

市朝者君所以建國也建國者必面朝後市王立朝

而後立市陰陽相承之義次司次也叙介次也陳猶

處也度丈尺也量豆區之屬鄭司農云佐后立市者始

立市后立之也祭之以陰禮者市中之社先后所立社

也故書淳為敦杜子春讀敦為純純謂幅廣也制謂匹

長元謂純制天子巡狩禮所云制幣丈八尺純四襍與

陰禮婦人之祭祀純諸

中春詔后帥内外命婦始蠶

於北郊以為祭服

蠶於北郊婦人以純陰為尊郊歲終

則會内人之稍食稽其功事

内人主為九御

佐后而受獻功者

比其小大與其麤良而賞罰之

獻功者九御之屬鄭司農云烝而獻功元謂典

婦功曰及秋獻功

會內宮之財用

計夫人以下所用財

正歲均其稍食施

其功事憲禁令於王之北宮而糾其守

均猶調度也施猶賦也北宮后

之六宮謂之北宮者繫於王言之明用王之禁令令之守宿衛者

上春詔王后帥六宮

之人而生種陸之種而獻之於王

六宮之人夫人以下分居后之六宮者古

者使后宮藏種以其有傳類蕃孽之祥必生而獻之示能育之使不傷敗且以佐王耕事共禘郊也鄭司農云先種後熟曰種後種先熟曰陸王當以耕種於藉田元謂詩云黍稷種種是也夫人以下分居后之六宮者每宮九嬪一人世婦三人女御九人其餘九嬪三人世婦九人女御二十七人從后唯其所燕息焉從后者五日

而沐浴其次又上十五日而徧
云夫人如三公從容論婦禮

內宰下大夫二人上士四人中士八人府四人史八

人胥八人徒八十人

內宰宮中官之長 疏內宰對
太宰治百官內宰治婦人之事

故名內宰太宰不
稱外者謂兼統內

九嬪掌婦學之法以教九御婦德婦言婦容婦功各帥

其屬而以時御叙於王所

婦德謂貞順婦言謂辭令婦
容婉婉婦功謂絲枲自九嬪

以下凡九而御於王所九嬪者既習於四事又備於從
人之道是以教女御也教各率其屬者使亦九九相與
從於王所息之燕寢御猶進也勸也進勸
王息亦相次叙 羣妃御見法見曲禮注凡祭祀贊王

盥贊后薦徹豆籩

玉盥王敦受黍稷器后進之而不徹故書玉為王也杜子春讀為玉

若

有賓客則從后

當贊后事

大喪帥叙哭者亦如之

亦從后帥猶道也后

哭衆之次序乃哭

世婦掌祭祀賓客喪紀之事帥女宮而濯

為齊盛

概拭也為猶差擇人炊之皆不使世婦此為非春非炊是差擇晚

饒

然及祭之日涖陳女宮之具凡內羞之物

涖臨也內羞房中之羞也

掌弔臨於卿大夫之喪

王使之往弔

女御掌御叙於王之燕寢

言掌御叙防上之專妬者於王之燕寢則王不就后宫息

疏掌御叙不使九嬪世婦掌之者謂在上妬嫉自專之事女御官卑不敢也

以歲時獻功事

絲枲成

功之事 凡祭祀贊世婦

助其帥 淮女官

大喪掌沐浴

王及后之喪

后

之喪持翼

翼棺飾也 持而從柩車

從世婦而弔於卿大夫之喪

從之

數蓋如使

者之介云

鄭氏曰不列夫人於此官者夫人之於后猶三公

之於王坐而論婦禮無官職世婦不言數者君子

不苟於色有婦德者充之無則闕女御昏義所謂

御妻御猶進也侍也

天子聘女納徵加穀珪

鄭元云納徵加於束帛賈公彥曰士以上皆同元纁束帛天子

加以穀
珪也

魯桓公八年祭公來遂逆王后于紀

公羊傳祭公者何天子之三公也何以不稱使冢宰周公

稱婚禮不稱主人時王者有母也遂者何生事也生猶造也專事之辭

大夫無遂事此其言遂何據待君命然後卒大夫也成使乎我也

以上來無事知成使乎我使所吏反其成使乎我柰何使我為媒可則

因用是往逆矣婚禮成於五先納采問名納吉納徵請期然後親迎時王者遣祭公來使

魯為媒可則因用魯往迎之不復成禮疾王者不重妃匹逆天下之母若逆婢妾將謂海內何哉故譏之

不言如紀者
辭有外文

女在其國稱女此其稱王后何王者無

外其辭成矣

九年春紀季姜歸于京師

公羊傳其辭成矣則其稱紀季姜何自我言紀父母

之於子雖為天王后猶曰吾季姜

明子尊不
加於父母

襄公十五年劉夏逆王后于齊

劉采地夏名也天子卿
書字劉夏非卿故書名

天子無外所命則
成故不言逆女

左氏傳十二年靈王求后於齊齊侯問對於晏桓子

桓子對曰先王之禮辭有之天子求后於諸侯諸侯

對曰夫婦所生若而人

不敢譽亦不敢毀故曰若而人

妾婦之子若

而人

言非適也

無女而有姊妹及姑姊妹則曰先守某公

之遺女若而人齊侯許昏王使陰里給之

陰里周大夫結成也

十五年官師從單靖公逆王后于齊卿不行非禮也

官師劉夏也天子官師非卿也劉夏獨過魯告昏故

不書單靖公天子不親昏使上卿逆而公監之故曰

卿不行非禮也

通典說曰禮記昏義云婚禮者將合二姓之好上

以事宗廟下以繼後代也故君子重之共牢而食合鬯而醕所以合禮同尊卑而親之成男女之別立夫婦之義而後父子親君臣正故曰婚禮者禮之本也公羊說天子至庶人皆親迎左氏說王者至尊無敵體之義不親迎鄭元駁之曰文王親迎於渭則天子親迎也天子雖尊然夫婦無判禮同一體所謂無敵豈施於此按禮記哀公問曰冕而親迎不亦重乎孔子對曰合二姓之好以繼先聖

之後以為天地宗廟社稷之主君何謂已重乎此
言繼先聖之後以為天地之主非天子則誰乎是
鄭以天子當親迎也杜元凱以為天子不親迎按
春秋祭公逆王后于紀傳曰禮也劉夏逆王后譏
卿不行皆不譏王不親行明是天子不當親迎也
文王之迎太姒身為公子迎在殷代未可據此以
為天子之禮孔子之對哀公自論魯國之法魯以
周公之後得郊祀上帝故以先聖天地為言耳非

說天子之禮

漢興因秦之稱號帝母稱皇太后祖母稱太皇太后適

稱皇后

師古曰適讀曰嫡后亦君也天曰皇天地
曰后土故天子之妃以后為稱取象二儀
妾皆

稱夫人又有美人良人八子七子長使少使之號焉

古師

曰良善也八七祿秩之差也長使少使主供使者

至武帝制倖仔姪娥俗僂充

依各有爵位

師古曰僥言接幸於上也。仔美稱也。姪娥皆美貌也。俗俗猶言奕奕也。便習之意也。

充依言充後庭而依秩序也僥音接仔音子
字或從女其音同耳姪音五經反倭音容

而元帝加

昭儀之號

師古曰昭顯其儀亦隆重也

凡十四等云

師古曰除皇后
自昭儀以下至

秩百石
十四等

昭儀位視丞相爵比諸侯王僉仔視上卿比列

侯嫪娥視中二千石比關內侯

師古曰中二千石實得二千石也中之言滿也

月得百八十斛是為一歲凡得二千一百六十石言二十者舉成數耳

俗倖視真二千石

比太上造

師古曰真二千石月得百五十斛一歲凡得千八百石耳太上造第十六等爵

美人

視二千石比少上造

師古曰二千石月得百二十斛一歲凡得一千四百四十石耳少上

造第十

五爵 八子視千石比中更

師古曰中更第十三爵也更音公衡反其下亦同

充依視千石比左更

師古曰左更第十二爵

七子視八百石比右

庶長

師古曰右庶長第十一爵

良人視八百石比左庶長

師古曰左庶長第十

爵
長使視六百石比五大夫師古曰五大夫第九爵少使視四百

石比公乘

師古曰公乘第八爵

五官視三百石

師古曰五官所掌亦象外之五官也

順常視二百石無涓共和娛靈保林良使夜者皆視百

石

師古曰涓潔也無涓言無所不潔也共讀曰恭言恭順而和柔也娛靈可娛樂情靈也保安也保林言其

可安衆如林也良使使令之善也夜者主職夜事令力成反

上家人子中家人子視

有秩斗食云

師古曰家人子者言采擇良家子以入宮未有職號但稱家人子也斗食謂佐史也

謂之斗食者言一歲不滿百石日食一斗二升

五官以下葬司馬門外

服虔曰陵上

馬門之外

高祖呂皇后名雉單父人高祖微時后父呂公相而異之妻以后生惠帝魯元公主高祖為漢王元年封呂公為臨泗侯高祖崩孝惠立尊后為皇太后

應歷代后之推尊為皇太后太妃者自推尊以後至崩葬事跡竝見太后門此不具錄後同

戚姬定陶人愛幸生趙王如意高祖崩為呂后所殺薄姬吳人初在魏王豹宮中豹亡輸織室高祖幸之生文帝自有子後希見文帝封代王從之文帝既立尊為

皇太后

孝惠張皇后宣平侯敖之女母魯元公主呂太后欲為重親故以魯元女配帝為皇后無子惠帝崩皇太后取後宮子立為帝太后崩大臣誅諸呂及所名孝惠子張后廢處北宮

北宮在未央之北

孝文後元年薨葬安陵不起墳

惠帝納后納采鴈璧乘馬束帛聘黃金二萬斤馬十

二匹

呂氏為惠帝娶魯元公主女故特優其禮

先公曰魯元壻其弟而不知帝之為人主也惠帝

妻其甥而不知妻之為皇后也夫上者民之父母
如此豈可以奉神靈之統哉蓋人倫顛倒而君道
陵夷甚矣

孝文竇皇后觀津人呂太后時以良家子選入宮太后
出宮人賜諸王各五人竇姬與至代代王幸之生女嫫
及景帝代王王后卒及入為帝立啓為太子竇姬為皇
后景帝立尊為皇太后

孝景薄皇后孝文薄太后家女也景帝為太子時太后

取為太子妃景帝立之為皇后無寵立六年薄太后崩坐廢廢後四年薨葬長安城東平望亭南

孝景王皇后槐里人初嫁為金王孫婦母臧氏奪之金以納太子宮景帝為太子愛幸之生三女及武帝景帝即位廢薄皇后及太子為臨江王乃立王夫人為后男為太子封后兄信為蓋侯武帝即位尊為皇太后

孝武陳皇后長公主嫖女父陳午武帝得立為太子長主有力乃取主女為妃及帝即位為皇后十餘年無子

元光五年坐巫蠱廢居長門宮後十餘年薨葬霸陵郎官亭東

孝武衛皇后字子夫生微為平陽主謳者帝悅之納宮中元朔元年生男據遂立為皇后據為太子立二十八年遭巫蠱事起太子誅江充發兵敗收后璽綬自殺宣帝立改葬謚思后

孝武李夫人本以倡進兄延年納之宮中得幸生昌邑哀王夫人早卒上憐之以后禮葬及衛思后廢後四年

武帝崩大將軍光緣上雅意以李夫人配食追上尊號
曰孝武皇后

孝武鉤弋趙婕妤河間人武帝巡狩過河間望氣者言
有奇女乃使使召之得幸為婕妤居鉤弋宮生昭帝後
從幸甘泉以譴死昭帝立追尊為皇太后

孝昭上官皇后祖桀父安隴西上邽人孝昭立召入宮
為婕妤月餘立為皇后年甫六歲立十歲而昭帝崩昌

邑王即位尊為皇太后

時年方十
四五歲

衛太子史良娣宣帝祖母太子有妃有良娣有孺子妻妾凡三等子皆稱皇孫史良娣家魯國元鼎四年入為良娣生男號史皇孫武帝末巫蠱事起衛太子及良娣史皇孫皆遭害宣帝即位追尊為戾后起園邑史氏侯者四人

史皇孫王夫人宣帝母名翁須太始中得幸於史皇孫皇孫妻妾無號位皆稱家人子征和二年生宣帝帝生數月衛太子皇孫敗家人子皆坐誅莫有收葬者宣帝

即位後追尊為悼后起園邑王氏侯者二人

孝宣許皇后父廣漢昌邑人宣帝養於掖庭號皇曾孫
廣漢以女妻之生元帝數月宣帝即位立為皇后廣漢
封昌成君明年為淳于衍所毒崩在位三年謚恭哀皇
后葬杜南是為杜陵南園

孝宣霍皇后大將軍光女許后崩光納之宮中立為后
立五年霍顯與子謀反誅坐廢處昭臺宮後十二歲徙
雲林館乃自殺葬昆吾亭東

孝宣王皇后父奉光長陵人宣帝即位入宮為婕妤帝
憐太子蚤失母幾為霍氏所害乃選後宮素謹慎無子
者立王婕妤為后令母養皇太子立十六年宣帝崩元
帝即位為皇太后

孝元王皇后名政君父禁居長安為廷尉吏宣帝時入
掖庭為家人子歲餘宣帝令送太子宫見內殿一幸有
身生成帝為皇孫元帝即位以妃為婕妤後三年立為
皇后成帝立為皇太后

孝成許皇后平恩侯嘉女元帝悼母恭哀后遭霍氏之禍故選嘉女配皇太子成帝即位立為皇后立十四年寵衰坐姊為媚道祝詛廢處昭臺宮後九年坐淳于長等與后姊嬖通書有諄謾賜藥自殺葬延陵交道廐西孝成班婕妤帝初即位選入後宮始為少使俄大幸為婕妤居增成舍有男後失之鴻嘉三年趙飛燕告許后及班婕妤挾媚道祝詛后坐廢婕妤入求共養太后長信宮至成帝崩婕妤充奉園陵薨因葬園中

孝成趙皇后本長安宮人

師古曰本宮人以賜陽阿主家也宮人者省中副使官婢

名曰宮人非天子掖庭中也事見漢舊儀言長安者以別甘泉等諸宮省也

屬陽阿主家學

歌舞號曰飛燕

以其體輕故也

成帝見而悅之召入宮大幸有

女弟復召入俱為倖忤許后廢乃立飛燕為皇后而女弟為昭儀姊弟專寵十餘年無子成帝暴崩民間歸咎趙昭儀皇太后詔問皇帝起居發病狀昭儀自殺哀帝立尊趙皇后為皇太后

孝元傳昭儀哀帝祖母父河內溫人昭儀少為上官太

后才人自元帝為太子得進幸帝即位立為倖仔甚有寵生一男一女男為定陶恭王帝既重傳倖仔及馮倖仔亦幸生中山孝王上欲殊之於後宮以二人皆有子為王上尚在未得稱太后乃更號曰昭儀賜以印綬在倖仔上昭其儀尊之也至成哀時趙昭儀董昭儀皆無子猶稱焉元帝崩隨王歸國稱定陶太后恭王薨子入為漢嗣為哀帝尊為恭皇太后

定陶丁姬哀帝母山陽瑕丘人恭王時姬為後宮生哀

帝帝入嗣漢即位尊為帝太后

孝哀傳皇后定陶太后從弟子哀帝為王時傳太后欲重親取以配王王入為漢太子傳氏為妃即位立為皇后哀帝崩王莽奏徙桂宮後月復與孝成趙后俱廢為庶人就其園自殺

孝元馮昭儀平帝祖母元帝即位二年以選入後宮生男為中山孝王元帝崩隨王之國哀帝立傳太后以素怨誣以罪自殺

中山衛姬平帝母成帝時中山孝王無子上以衛氏子
豪少女配孝王生平帝孝王薨代為王哀帝崩無子太
皇太后詔迎中山王立為帝王莽欲專權懲丁傅行事
乃令帝母衛姬及外家不得至京師更立宗室桃鄉侯
子成都為中山王奉孝王後賜衛姬璽綬拜為中山孝
王后加湯沐邑後以事誅衛氏支屬唯后在莽篡位廢
為家人歲餘卒

孝平王皇后安漢公王莽女平帝即位莽以女配帝以

禮迎立為皇后歲餘平帝崩莽立孝宣元孫嬰為孺子
尊后為皇太后莽篡以嬰為定安公改后為定安公太
后時年十八自劉氏廢每稱疾不朝會莽敬悼哀傷欲
嫁之更號為黃皇室主若漢之稱公主后怒發疾不肯起莽不
能強漢兵誅莽后赴火而死

王莽納女為后以固權遣宗正劉宏尚書令平晏納
采太師孔光大司徒馬宮等四十九人賜皮弁素積
皮弁鹿皮為冠也素積以十以禮雜卜筮太牢告宗
五升布為衣積素以為裳

廟封后父百里尊而不臣有司奏故事聘皇后黃金
二萬斤為錢一萬萬莽深辭讓受四千萬而以其三
千三百萬予十一媵家有詔復益二千三百萬合為
三千萬莽復以其千萬分子九族貧者遣甄豐奉璽
綬拜帝母衛姬為中山孝王后四年春遣大司徒宮
等奉乘輿法駕迎皇后於安漢公第授皇后璽紱顏
古曰紱所登車稱警蹕取日時便時上臨延壽門入
以繫璽之便未央宮前殿羣臣就位行禮大赦天下益封安漢公

地滿百里賜迎皇后及行禮者三公以下宰執皆增
秩賜金帛各有差皇后立三月以禮見高廟尊父號
曰宰衡位在諸侯王上

班固贊曰易著吉凶而言謙盈之效天地鬼神至
於人道靡不同之夫女寵之興繇至微而體至尊
窮富貴而不以功此固道家所畏禍福之宗也序
自漢興終於孝平外戚後庭色寵著聞二十有餘
人然其保位全家者唯文景武帝太后及邛成后

四人而已至如史良娣王悼后許恭哀后身皆夭折不辜而家依託舊恩不敢縱恣是以能全其餘大者夷滅小者放流嗚呼鑒前行事變亦脩矣

東漢皇后紀叙論秦并天下多自驕大宮備七國

史記始皇

破六國寫放其宮室作之咸陽北阪上南臨渭水殿屋複道周閣相屬所得諸侯美人以充實之并秦為七也

爵列八品

前書曰漢興因秦之稱號正嫡稱皇后妾皆稱夫人又有美人良人八子七子長使少使

之號漢興因循其號而婦制莫釐

釐理

高祖帷薄不修

大戴禮曰

大臣坐污穢男女無別者不曰污穢曰帷薄不修謂周昌入奏事高帝擁威姬是不修也孝文衽席

無辨

鄭元注禮記曰衽卧席也孝文幸慎夫人每與皇后同坐是無辨也

然而選納尚簡

飾翫少華自武元之後世增滛費至乃掖庭三千增級

十四

使仔一嫔娥二容華三充衣四已上武帝置昭儀五元帝置美人六良人七七子八八子九長使十

少使十一五官十二順常十三無涓共和娛靈保林良使夜者十四此六官品秩同為一等也妖幸毀

政之符外姻亂邦之跡前史載之詳矣及光武中興斷

彫為朴六宮稱號唯皇后貴人貴人金印紫綬奉不過

粟數十斛又置美人宮人采女三等並無爵秩歲時賞

賜充給而已漢法常因八月算人

漢儀注曰八月初遣為算賦故曰算人遣

中大夫與掖庭丞及相士於洛陽鄉中閱視良家童女
年十三以上二十以下姿色端麗合法相者載還後宮
擇視可否乃用登御所以明慎聘納詳求淑哲明帝聿
遵先旨宮教頗修登建嬪后必先令德內無出閫之言
權無私溺之授可謂矯其弊矣向使因設外戚之禁編
著令甲改正后妃之制貽厥方來豈不休哉雖御已有
度而防閑未篤故孝章以下漸用色授恩隆好合遂亡
緇蠹

緇黑也蠹食木
虫以喻傾敗也

云云

見太
后門

故考列行跡以為皇后

本紀雖成敗事異而同歸正號者並列於篇其以私恩

追尊非當時所奉者則隨事附出

謂安帝母左姬及祖母宋貴人之類並見

清河孝王傳

親屬外事各依列傳其餘無所見則繫之此紀

謂貴人虞美人之類是以綴西京外戚云爾

光武郭皇后諱聖通真定豪人更始二年光武擊王郎

至真定納后有寵即位以為貴人建武二年立為皇后

十七年以寵衰怨懟廢為中山王太后

后中子封中山王

二十

年中山王徙封沛王后為沛太后二十八年薨葬北邙

按西都廢后如薄如陳如霍如許皆幽之別宮至
光武郭后則以有子為王故得隨子之國然帝在
而稱太后非名也

光烈陰皇后名麗華南陽新野人更始元年帝納后於
宛即位封貴人生顯宗十七年廢皇后郭氏而立貴人
制詔三公曰皇后懷執怨懟數違教令不能撫循他子
訓長異室宮闈之內若見鷹鷂既無關雎之德而有呂
霍之風豈可託以孤幼恭承明祀其上皇后璽綬陰貴

人鄉里良家歸自微賤自我不見於今三年宜奉宗廟
為天下母主者詳按舊典時上尊號異常之事非國休
福不得上壽稱慶顯宗即位尊為皇太后

明德馬皇后伏波將軍援之小女世祖時選入太子宫
顯宗即位以為貴人永平三年立為皇后肅宗即位尊
為皇太后

賈貴人南陽人建武末選入太子宫生肅宗為貴人帝
既為明德后所養專以馬氏為外家故貴人不登極位

及太后崩乃冊書加貴人王赤綬

諸侯王赤綬也

章德竇皇后扶風平陵人大司徒融之曾孫以選入掖庭建初三年立為皇后和帝立尊為皇太后

梁貴人梁竦女建初中入掖庭生和帝竇后以為己子忌梁氏誅竦貴人以憂卒竇后崩上尊號曰恭懷皇后追服喪服葬西陵

和帝陰皇后光烈皇后兄執金吾識之曾孫永元四年選入掖庭為貴人八年立為后十四年坐祝詛事廢遷

桐宮以憂卒立七年葬臨平亭部

和熹鄧皇后名綏太傅禹之孫永光八年入掖庭為貴人十四年陰后廢立為皇后帝崩殤帝立尊為皇太后安思閭皇后名姬河內滎陽人元初元年以選入掖庭為貴人三年立為皇后譖皇子保廢之帝崩立北鄉侯懿尊為皇太后

安帝宮人李氏生皇子保閭后專房妬忌鴆殺李氏譖廢保為濟陰王安帝崩立北鄉侯懿懿卒中黃門孫程

等迎保立之為順帝遷閭太后於離宮后崩上李氏尊號曰恭愍皇后葬恭北陵為冊書金匱藏於世祖廟

順烈梁皇后名嬀

音納 嬀娶也

大將軍商之女永建三年入

掖庭為貴人陽嘉元年立為皇后順帝崩冲帝立尊為皇太后

虞美人以良家子選入掖庭生冲帝帝早夭大將軍梁冀秉政忌惡他族故抑而不登但稱大家而已陳夫人魏郡人少以聲技入孝王宮得幸生質帝亦以梁氏故

榮寵不及熹平四年小黃門趙祐等言春秋之義母以子貴今冲帝母虞大家質帝母陳夫人皆誕聖皇而未
有稱號夫臣子雖賤尚有追贈之典况二母見在不蒙
崇顯之次無以述遵先世垂示後世也帝感其言乃拜
虞大家為憲陵貴人陳夫人為渤海孝王妃孝王名鴻生質帝
使中常侍持節授印綬遣太常以三牲告憲陵懷陵靜

陵馬

懷陵冲帝陵
靜陵質帝陵

桓帝懿獻梁皇后名女瑩順烈皇后之女弟帝立迎立

為皇后皇太后崩恩愛稍衰延熹三年以恚崩在位十三年葬懿陵其歲誅梁冀廢懿陵為貴人冢

帝既立明年有司奏太后曰春秋迎皇后于紀在塗

則稱后今大將軍冀女弟應昭聖善結婚之際有命

既集

帝為蠡吾侯梁太后徵欲與后為昏未及而質帝崩帝即位冊為后

宜備禮進徵

幣於是悉依孝惠皇帝納后故事聘黃金二萬斤納

采鴈璧乘馬束帛一如舊典

桓帝鄧皇后名猛女和熹皇后從兄子鄧香之女永興

中進入掖庭為米女絕幸梁后崩梁冀誅立為后八年
坐驕忌廢以憂死立七年葬北邙

桓思竇皇后名妙章德皇后從祖弟孫女延熹八年鄧
后廢以選入掖庭為貴人其冬立為皇后帝崩靈帝立
尊為皇太后

靈帝宋皇后扶風平陵人肅宗宋貴人之從曾孫建寧
三年選入掖庭為貴人明年立為皇后無寵為中常侍
王甫及後宮幸姬等所譖坐廢以憂死

靈帝冊宋貴人為皇后天子御章德殿軒百官陪位

太尉襲使持節奉璽綬皇后北面帝南面太尉立階

下東向宗正大長秋西向宗正讀冊

文曰惟建寧四年七月乙未制

詔皇后之尊與帝同體供奉天地祇承宗廟母臨天下故有華興殷姜任母周二代之崇蓋有內德長秋宮闕中宮曠位宋貴人垂淑媛之懿體河山之儀威容昭曜德冠後庭羣僚所咨人曰宜哉卜之著龜卦得坤乾有司奏議宜稱紱組以母兆人今使太尉襲使持節奉璽綬紱宗正祖為副立貴人為皇后后其往踐爾位敬尊禮典肅慎中冊文畢皇后拜稱臣任位饋母替朕命永終天祿

太尉授璽綬中常侍長秋太僕高鄉侯覽長跪受璽

紱奏於殿前女使授嬈好遂長跪受以授昭儀受長
跪以帶皇后皇后伏起拜稱臣妾畢黃門鼓吹三通
鳴鼓畢羣臣以次出后即位大赦天下皇后秩比國
王即位威儀赤紱玉璽也

漢制乘輿黃赤綬四米黃赤縹紺紱黃質長二丈九

尺九寸太子太后綬與乘輿同

靈思何皇后南陽宛人家本屠者以選入掖庭

風俗通曰漢以

八月箕人后家以金帛賂遣主者以求之也

生皇子辯拜為貴人光和三年

立為皇后靈帝崩皇子辯即位尊為皇太后

王美人趙國人以良家子選入掖庭生皇子協何后妬而酖之董卓既廢少帝立協是為獻帝後追尊為靈懷皇后改葬文昭陵

獻帝伏皇后名壽瑯琊東武人大司徒湛之八世孫初平元年入掖庭為貴人興平二年立為皇后建安十九年為曹操所殺在位二十年

獻穆曹皇后名節魏公曹操之中女建安十八年操進三女憲節華為夫人聘以束帛元纁五萬匹小者待年

於國

留住於國以待年長

十九年並拜貴人伏皇后殺立節為皇

后在位七年帝禪於魏降為山陽公夫人魏景初元年

薨合葬禪陵

范曄論曰漢世皇后無謚皆因帝謚以為稱雖呂

氏專政上官臨制亦無殊號

上官昭帝后也

中興明帝始

建光烈之稱其後並以德為配至於賢愚優劣混

同一貫故馬竇二后俱稱德焉其餘惟帝之庶母

及蕃王乘統以追尊之重特為其號如恭懷孝崇

之比是也初平中蔡邕始追正和熹之謚

蔡邕集議曰漢

世母氏無謚至於明帝始建光烈之稱是後轉因帝號加之以德上下優劣混而為一違禮大行受大名小行受小名之制謚法有功安人曰熹帝后一體禮亦宜同大行皇太后謚宜為和熹其

安思順烈以下皆依而加焉

魏因漢法母后之號皆如舊制自夫人以下世有增損太祖建國始命王后其下五等有夫人有昭儀有婕妤有容華有美人文帝增貴嬪淑媛修容順成良人明帝增淑妃昭華修儀除順成官太和中始復命夫人登其

位於淑妃之上自夫人以下爵凡十二等貴嬪夫人位次皇后爵無所視淑妃位視相國爵比諸侯王淑媛位視御史大夫爵比縣公昭儀比縣侯昭華比鄉侯修容比亭侯修儀比關內侯婕妤視中二千石容華視真二千石美人視比二千石良人視千石

武宣卞皇后瑯琊開陽人本倡家年二十太祖納之於譙為妾生文帝諸子無母者皆令母養之建安二十四年拜為王后文帝受禪尊為皇太后

文昭甄皇后中山無極人本袁熙妻冀州平文帝納之
生明帝皇初二年以怨望賜死明帝即位追謚

文德郭皇后安平廣宗人太祖時得入東宮文帝為太
子立為夫人及踐祚為貴嬪皇初三年立為皇后明帝
即位尊為皇太后

明悼毛皇后河內人皇初中以選入東宮明帝即位以
為貴嬪太和元年立為皇后景初元年以愛弛賜死加
謚英愍陵

明元郭皇后西平人世河右大族皇初中本郡反叛遂
没入宮明帝愛幸之拜為夫人後立為皇后齊王即位
尊為皇太后

魏制天子冊后以皮馬庭實加穀珪齊王正始四年
立后甄氏其儀不存

晉景獻羊皇后名徵瑜泰山南城人景帝納之無子武
帝愛禪居弘訓宮號弘訓太后咸寧四年崩

文明王皇后名元姬東海郯人父肅魏中領軍蘭陵侯歸

於文帝生武帝帝受禪尊為皇太后宮曰崇化

初置宮卿重其

選以太常諸葛緒為衛尉太僕劉原為太僕宗正曹楷為少府

四年崩

武元楊皇后名艷弘農華陽人父文宗武帝為世子聘

之即位立為皇后

有司奏依漢故事皇后太子各食湯沐邑四十縣而帝以非古典不許

生惠帝泰始十年崩葬峻陽陵

泰始中帝博選良家以充後宮先下書禁天下嫁娶

使宦者乘使車給騶騎州郡召充選者使后揀擇后

性妬惟取潔白長大端正美麗者司徒李允領軍大

將軍胡奮廷尉諸葛冲太僕臧權侍中馮蓀祕書郎
左思及世族子女並充三夫人九嬪之列司冀兗豫
四州二千石將吏家補良人以下名家盛族子女多
敗衣瘁貌以避之 九年帝多遣良家子女以充內
職自擇其美者以絳紗繫臂平吳之後復納孫皓宮
人數千自此掖庭殆將萬人而並寵者甚衆帝莫知
所適常乘羊車恣其所之至便宴寢宮人乃取竹葉
插戶以鹽汁灑地而引帝車 十年將聘三夫人九

嬪有司奏禮皇后聘以穀珪無妾媵禮贄之制詔曰
拜授可依魏氏故事於是臨軒使使持節兼太常拜
三夫人兼御史中丞拜九嬪

武悼楊皇后名芷元后從妹父駿以咸寧二年立為皇
后惠帝立尊為皇太后

武帝咸寧二年臨軒遣太尉賈充冊立皇后楊氏因
大赦賜王公以下各有差百僚上禮

納悼后

太康八

年有司奏大婚納徵用元纁束帛加穀珪馬二駟羊

鴈酒米如故

尚書朱整議按魏昏故事天子以皮馬為庭實加以穀珪

左貴嬪名芬兄思好學善文名亞於思武帝聞其名納之拜修儀

胡貴嬪名芳父奮泰始九年納宮中拜貴嬪生武安公主

諸葛夫人名婉瑯瑯陽都人父冲以泰始九年入宮拜為夫人

惠賈皇后名南風平陽人父充泰始八年冊拜太子妃

帝即位立為皇后干政廢楊太后淫恣在位十一年趙王倫等廢而殺之

惠羊皇后名獻容泰山南城人賈后既廢孫秀乃立為皇后時太安元年成都王穎奏廢為庶人陳眕等伐又復后位張方入洛又廢后大駕幸長安又復永興初又廢河間王顥欲殺后周馥止之帝崩懷帝立尊為惠皇后居弘訓宮洛陽敗沒於劉曜曜僭位以為后生二子而死偽謚文獻皇后

先公曰自司馬懿廢齊王芳司馬昭弑高貴鄉公而皆假太后以為言既以此得成篡矣詎意其後改易詔書黜亮升駿者后為之也偽立文字弑武悼殺愍懷者后為之也彼羊后區區一放廢婦人囚處宮圍何預世事而今日復明日廢紛紛未已何邪姦人常懼有假之以舉事如前之為者是以一人復之則一人廢之至辱於非類而後已哀哉誰實基之

謝夫人名玖父以屠羊為業武帝時入後庭為才人帝以賜太子生皇孫適適立為太子拜淑媛及愍懷太子遇害玖亦死

懷帝王太后名媛武帝宮才人生懷帝早卒帝即位追尊曰皇太后

元帝夏侯太妃名光姬沛國譙人瑯琊武王為世子納焉生元帝帝嗣位稱王太妃永嘉初薨於江左

元敬虞皇后名孟母濟陽外黃人父豫元帝為瑯琊王

納為妃無子永嘉六年薨大興三年追冊為皇后

豫章君荀氏元帝宮人生明帝帝即位封建安君成帝
立尊重同於太后咸康元年薨

明穆庾皇后名文君潁川鄢陵人父琛元帝聘為太子
妃明帝即位立為皇后成帝即位尊為皇太后

晉太康中有司奏太子昏納徵用元纁束帛加璧羊

馬二駟

東晉太子昏納徵禮用玉璧一虎皮二

王彪之上書
曰或者虎取

威猛有斑彩蔚玉象德而有潤珪璋亦玉之美者豹皮彩蔚以譬君子王肅納徵辭云元纁束帛儷皮鴈羊前漢亦無用羊之禮鄭氏昏物贊曰羊者祥也婚之有羊自漢末始

成恭杜皇后名陵陽京兆人鎮南將軍預之曾孫成帝備禮拜為皇后在位六年崩年二十一

咸康二年帝臨軒遣使持節兼太保領軍諸葛恢兼太尉護軍孔愉六禮備物拜皇后杜氏即日入宮帝御

太極殿羣臣畢賀

賀非禮也王者昏禮禮無其制春秋祭公逆王后于紀穀梁左氏說

與公羊又不同而况漢魏遺事闕略者衆晉武惠納后江左又無儀注故成帝將納杜后太常華恒始與

博士參定其儀據杜元凱左氏傳說主昏是供其昏禮之幣而已又周靈王求昏於齊先儒以為邱明詳錄為王者昏禮故成帝臨軒遣使稱制拜后然其儀注又不具存

章太妃周氏以選入成帝宮生哀帝及海西公拜貴人哀帝即位詔有司議貴人位號太尉桓溫議宜稱夫人尚書僕射江彪議應曰太夫人詔崇為皇太妃儀服與太后同

康獻褚皇后名蒜子河南陽翟人父哀少以名家入為瑯琊王妃康帝即位立為皇后穆帝即位尊為皇太后

康帝建元元年納后褚氏而儀注陞者不設旄頭殿
中御史奏今迎皇后依昔成恭皇后入宮御物而儀注
至尊袞冕升殿旄頭不設昔迎恭皇后唯作青龍旗
其餘皆即御物今臨軒遣使而五牛旗旄頭畢罕並
出即用舊制今闕詔曰今所以正法服升太極者以
敬其始故備禮也今何闕所重而撤法物邪又恭后
神主入廟先帝詔后禮宜有降不宜建五牛旗既不
設五旗則旄頭畢罕易具也又詔舊制既難具於今

而備法服儀飾粗舉兼副雜器停之

穆帝永和十年臺符問六禮版文舊稱皇帝今太后

臨朝當何稱博士曹耽云公羊傳昏禮不稱主人母

命諸父為主

傳紀履繻來逆女不稱使也無母辭窮乃命使者耳

太常王彪之

云三傳異義不可全據今皇后臨朝稱制文告所達

國之大典皆仰稟成命非無外事也豈婚聘獨不通

乎六禮版文應稱皇太后詔

彪之又曰天子嫁女使同姓之國為主者以受

體於皇極則有虧婚姻之敵禮至於迎后之制必禮成而後入雖復戚屬之尊亦臣妾也天王之后寧可

先之蕃國然後入臨六宮乎是以祭公
來迎王后於紀使我為媒不云為主
符又問今后

還政不復臨朝當何稱彪之云當稱皇帝詔
升平

元年將納皇后何氏彪之正禮

始更大引經傳及諸
故事深非公羊昏禮

不稱主
人之義

曰王者之於四海無不臣妾雖復父兄之親

師友之賢皆純臣也夫崇三綱之始定乾坤之儀安

有天父之尊而稱臣下之命以納伉儷安有臣下之

卑而稱天父之名以行大禮遠尋古禮於義不通按

咸寧二年納悼皇后時弘訓太后臨天下而無命戚

屬之臣為武皇父兄主婚之文考咸寧故事不稱父

兄師友則咸康華恒所上合於舊也謂今納后儀制

一依咸寧故事從之

華恒定六禮云宜依舊及大晉已行之制此恒猶識前事故王

彪之多從咸康由此也唯以娶婦之家三日不舉樂而咸康羣臣賀為失禮故但依咸寧上禮群臣不復賀也其告廟六禮版文等皆彪之所定

博士孫納云凡六禮版長尺二

寸以應十二月博四寸以象四時厚八分以象八節皆真書后家答則以鮫脚書之

納采用鴈

一頭白羊一口酒十二斛

文曰皇帝咨前大尉參軍都鄉侯何渾元資始肇經

人倫爰及夫婦以奉宗廟天地社稷謀於公卿咸以為宜率由舊典今使持節崇德衛尉領太常彪之兼

宗正散騎侍郎綜以禮納采后家答曰皇帝嘉命訪昏陋族備數采擇臣之先臣散騎侍郎準之遺女未聞教訓衣履若如人欽承舊章肅奉典制前太尉參軍都鄉侯糞土臣何琦頓首稽首再拜

名用鴈羊如前

文曰皇帝曰咨前某官侯何兩儀配合承天統物正位於內必俟名族重

申舊典今使持節某官彪之某官綜以禮問名后家答曰皇帝嘉命使者彪之重宣中詔問臣名族女父母所生先臣故光祿大夫雱婁侯禎之遺元孫先臣故豫州刺史闕內侯憚之曾孫先臣故安豐太守闕內中侯友之孫先臣故散騎侍郎準之遺女外出自於先臣故內書左丞孔胄之外曾孫先臣故侍中闕內侯夷之外孫女年十七欽承舊章肅奉典制前某官某侯糞土臣何琦稽首頓首再拜恭承制詔

吉用鴈羊酒如前

文曰皇帝曰咨前某官某侯何人謀龜從僉曰貞吉敬順典禮今使

持節某官彪之某官綜以禮納吉后家答曰皇帝嘉
命使者彪之重宣中詔大卜元吉臣陋族卑鄙憂懼
不堪欽承舊章肅奉典制前某官某
侯糞土臣何琦稽首頓首再拜承制
納徵用白羊一

口元纁帛三疋絳二疋絹二百疋獸皮二枚錢二百

萬玉璧一枚酒十二斛馬六駟

文曰皇帝曰咨某官某侯何之族女有母

儀之德窈窕之姿如山如河宜奉宗廟永承天祚以
元纁皮馬羊錢璧以章典禮今使持節兼司徒先祿
勳閭內侯恪崇德衛尉領太常彪之以禮納徵后家
答皇帝嘉命使者恪重宣中詔降昏卑陋命以上公
寵以豐禮備物典冊欽承舊章肅奉
典制前某官某侯云云再拜承制詔
請期用鴈羊酒
米如初
文曰皇帝曰咨前某官某侯何謀於公卿大
筮元龜罔有不臧率遵典禮今使某官彪之

某官綜以禮請期后家答皇帝嘉命使者彪之重宣中詔吉日惟八月壬子可迎臣欽承舊章肅奉典制前某官某侯某再拜承制詔迎用鴈羊酒米如初

文曰皇帝曰咨前某官某侯何

歲吉月令吉日唯未率禮以迎今遣使持節兼太保侍中太宰武陵王晞迎后家答皇帝嘉命使者晞重宣中詔令月吉辰備禮以迎上公宗卿兼至副介近臣百兩臣螻蟻之族猥承大禮憂懼戰悸欽承舊章肅奉典制前某官某侯某謹因使者兼某官某侯王晞上謹答冊皇后文曰惟

升平元年八月皇帝使使持節兼太保侍中太宰武陵王晞冊命故散騎侍郎女何氏為皇后咨爾易本乾坤詩首闕睢王化之本實由內輔是故皇英嬪虞

帝道以光任姒母周允嗣克崇皇后其祗勗厥德以肅承宗廟虔恭中饋盡敬婦道帥導六宮作軌儀於四海皇天無親惟德是依可不慎歟

穆章何皇后名法倪廬江蕩人父準升平八年以名家膺選冊為皇后無子哀帝即位稱穆皇后居永安宮永興三年崩年六十六在位四十八年

哀靖王皇后名穆之大原晉陽人司徒左長使濛之女哀帝即位以王妃立為皇后無子在位三年興慶三年崩

廢帝庾皇后名道憐潁川陽陵人父冰初為東海王妃
王即位立為后太和六年崩帝廢追贈為海西公夫人
簡文宣鄭太后名阿春河南滎陽人先適渤海田氏生
一男而寡元帝納之生簡文帝咸和元年薨簡文即位
未及追崇孝武時追上尊號曰簡文太后

簡文順王皇后名簡姬太原晉陽人父遐選為會稽王
妃生子道生失意以憂死孝武帝即位追尊曰順皇后
合葬高平陵

孝武文李太后名陵容本出微賤簡文屢失子召幸之
生孝武帝帝即位尊為淑妃後追為皇太妃

孝武定王皇后名法慧哀靖皇后之姪父蘊孝武即位
納為后太元五年崩年二十一葬隆平陵

安德陳皇后名歸女松滋潯陽人孝武時入宮為淑媛
生安恭二帝後追崇曰太后

安僖王皇后名神愛瑯琊臨沂人父獻之初為太子妃
安帝即位立為皇后無子義熙八年崩年二十九葬休

平陵

恭思褚皇后名靈媛河南陽翟人父爽初為瑯琊王妃
恭帝即位立為皇后帝禪位降為零陵王妃宋元嘉十
三年崩年五十三祔葬冲平陵

文獻通考卷二百五十三